

東
華
續
錄

東華續錄

同治六

臣王先謙敬編

臣張式恭恭校

二月甲寅朔諭內閣官文李續宜奏剿辦黔匪獲勝並攻克來鳳城池一招黔省大股逆匪竄踞湖北來鳳縣城經官文等飭派記名臬司劉嶽昭督率各軍會合湖南營官鄭陽和等分路圍剿將來鳳城池攻克餘匪向忠堡一帶奔竄辦理甚爲得手著卽督飭各軍乘勢進剿痛殲醜類毋畱餘孽○予湖北陣亡副將惠春等江南陣亡內閣中書陳克家祭葬世職○乙卯欽奉 母后皇太后 聖母皇太后懿旨前因皇帝沖齡亟宜典學曾經降旨令議政王等保舉師傅嗣經該王等各舉所知臚列以聞皇帝當養正之年自應及時就學以裕聖功見諭欽天監選擇吉期於二月十

二日皇帝在弘德殿入學讀書翰林院編修李鴻藻前蒙 文宗
顯皇帝派令授讀茲復特簡禮部尚書前大學士祁寯藻管理工
部事務前大學士翁心存工部尚書倭仁均屬老成端謹學問優
長堪膺師傅之任祁寯藻翁心存倭仁李鴻藻均著在弘德殿授
皇帝讀該大學士尚書等各以耆碩重望爲時所推歷受 累朝
恩遇之隆至優極渥編修李鴻藻經 先皇帝特加簡用其各朝
夕納誨同心啟沃帝王之學不在章句訓詁惟冀首端蒙養懋厥
身修務於一言一動以及天下民物之蹟古今治亂之原均各講
明切究悉歸篤實庶幾輔成令德指正施行宏濟艱難克光大業
至於國語清文係屬我朝根本皇帝尤應勤加諳悉紹述心傳
先皇帝曾派禮部尚書倭什琿布充總誥達禮部左侍郎伊精阿
在上書房行走著再添派兵部尚書愛仁均著在弘德殿教習清

文以資講貫皇帝寅承景命當思付畀之重遜志時敏虛懷聽受日就月將學有緝熙於光明用保我不丕基惠親王三分最尊品行端正著在弘德殿常川照料專司督責其尋常一切應派差使除朝祭大典外俱著毋庸開列以示體恤惠親王之子奕詳並著在弘德殿伴讀恭親王誼屬親賢公忠弼亮素爲皇帝所敬重見當就學之初尤資夾輔之力所有皇帝讀書課程及弘德殿一切事務均著總司稽查用收實效○奉 懿旨蒙古語言文字及騎射等事皇帝亦應兼肄著派御前大臣等隨時教習○諭議政王軍機大臣等勝保奏官軍迎擊西竄捻匪獲捷見馳紮陳州調度並擬調楊飛熊一軍馳赴槐店策應援潁前敵兵勇各摺片此次逆賊圍攻潁郡勢甚危迫副都統烏勒興阿副將劉景芳經勝保飭令援潁乃託詞沙南勦匪獲勝鄉民長跪哀求不放出寨顯係

心存畏蕙烏勒興阿劉景芳著先行摘去頂帶該大臣責令由劉家集一帶剋期援穎不准片刻逗遛總兵成祿帶隊赴穎已近兩月尙未進援尤屬畏蕙無能卽著該大臣嚴飭相機進剿儻仍沿途遷延必當重治其罪勝保本係統兵援穎惟新汝等處徧地賊氛准其暫紮陳州第該郡距賊較遠該大臣仍當酌量前進楊飛熊一軍本因汝甯兵單調往助剿勝保已派成祿等軍八千名赴皖河南省防空虛應否飭令該員馳赴槐店策應援穎之處卽著鄭元善酌量辦理毫匪由鹿邑西竄擾及吳召廟地方毛利熙統兵五千餘名務當力遏賊鋒省防尤應妥籌儻有緊急勝保仍當派兵策應不得以兵單爲詞致有貽誤賈臻一面激勵將士竭力固守一面催提成祿等軍迅速馳援儻再託詞延玩卽由該藩司參奏袁甲三於穎郡情形雖道途阻隔亦當隨時探明奏報以期

周密將此由六百里加緊各諭令知之○諭前因風聞山東拏獲奸細張林供出軍營有奸細數百當經密諭該大臣等查拏並諭譚廷襄嚴切根究茲據譚廷襄奏提訊張林供係陳逆四眼狗派伊赴北路探聽消息勾結內應給伊太平天國封條二紙並太陽穴烙疤痕爲記又供自咸豐九年卽投入勝保軍營充勇等語張林烙印及偽印封條已據驗明其爲奸細已確旣稱投入勝保軍營夥黨自必不少勝保切須一一根究譚廷襄如咨提人犯須按名解往俾無漏網方爲妥善此係軍營常有之事斷不可稍有回護若一旦竊發非獨貽誤大局該大臣亦必先受其禍也再本日據勝保奏稱皖豫髮捻鴟張苗練宜從緩密辦不宜急切須俟頑郡解圍後酌度奏明請旨等語潁郡被圍甚急已另有旨諭知該大臣酌辦苗練兇頑性成各圩畏其威燄勉強脅從究屬不難解

散該大臣惟當仍遵前旨一面散其黨與一面密速定計翦除巨
憝李續宜不日可以到皖該大臣與之共辦一事必須和衷熟商
斷不可此勦彼撫意見兩歧是爲至要將此由六百里密諭知之
○丙辰諭內閣江蘇布政使著曾國荃補授該員係兩江總督曾
國藩之弟例應迴避惟該省軍務緊要需員辦理著毋庸迴避以
資得力○諭劉長佑奏官紳攻克養利州城見在乘勝圖取太平
府城一招廣西太平府城被逆匪吳淩雲等攻陷養利州城相繼
失守經劉長佑督令署左江道吳德徵等分道攻取吳德徵派委
卸任宣化縣知縣朱騰偉等會同團紳壯練四路截殺擒獲匪黨
黃啟鼂等七十餘名當於二十七日收復養利州城被陷各鄉村
亦陸續收復辦理均尙得手著劉長佑督飭各官紳等乘勝進取
太平府城盡殲醜類毋畱餘孽○諭吳棠奏馳勦東甌捻股並回

援清江疊獲勝仗一招擒匪大股竄至阜甯之東溝東坎等處撲犯淮安經吳棠與晏端書督飭在城文武官紳嚴加防守另股由西北涇河兩岸直撲車橋署總兵龔耀倫等督帶步勇繞出賊後遊擊黃國瑞等衝入賊中夾擊該逆向西北奔潰各軍乘勝追殺二十餘里復經鄉團截殺餘匪潰竄其徑撲淮關馬賊亦經擊退該逆竄至王營襲撲清江適吳棠馳回防守縣丞吳炳庭等帶隊衝突沿途勦殺擒首李成帶領馬隊直撲板牯經把總張士芳等奮擊砍傷李成落馬該逆向西北敗竄仍著吳棠會同德楞額將西竄捻股追勦淨盡此次在事各員雖未據奏請獎敘而覽其所奏以少擊眾勦辦尙屬出力著吳棠擇尤保奏候朕施恩○諭議政王軍機大臣等前因上海軍情萬分緊要疊經諭令曾國荃統領楚軍赴援計該藩司此時已可由楚南募勇回皖著曾國藩迅

卽飭令督兵馳赴上海將松滬一帶賊匪剿退李鴻章是否業已
赴鎮著曾國藩迅催該道於帶兵抵鎮後會同曾國荃籌商進兵
規復蘇常以固東南大局毋得再事遷延致滋貽誤李元度進攻
龍游日久未克近日攻剿情形亦未據左宗棠奏報該臬司前在
徽郡貽誤軍情未經懲辦見經棄瑕錄用曾國藩等務宜飭令該
臬司奮勇立功迅將壽昌龍游一帶踞匪剿除攻克城池以贖前
愆並由上游建瓴而下會合左宗棠徽郡進攻之師夾攻嚴郡爲
恢復杭郡之計儻再因循遷延擁兵不進必當重懲不貸將此由
六百里各諭令知之○以李元度爲浙江按察使由鹽運使遷○予廣
西陣亡參將鮑得揚祭葬世職○丁巳諭內閣慶端奏剿辦平陽
逆匪獲勝克復縣城一摺浙江平陽縣城於上年十二月間被匪
竄陷經總兵秦如虎等督率員弁分路設伏該逆蜂擁而來我軍

槍礮齊施立斃賊千餘名生擒四十三名秦如虎乘勝進攻擒斬逆匪不計其數遂於本年正月初三日將縣城收復勦辦尙屬出力著慶端督飭在事各員乘勝盡殄醜類毋畱餘孽○曾國藩奏逆匪楊輔青糾眾圍攻徽郡張運桂率老湘營堅守十二月初八日派隊出擊斬擒三四百名初十日賊眾圍撲城外營牆我軍埋伏夾擊轟斃四五百名是夜復選壯勇絕城燒賊所踞房屋傷賊無數十六日進攻北門賊壘該逆憑牆死守我軍奮身齊進連毀賊營五座屍橫枕藉南路援賊蜂擁而來亦經我軍擊敗該逆分股東趨又與嚴州大股併竄屯溪及巖寺街潛口一帶以阻徽軍糧路二十日我軍分數路齊抵賊壘奮力攻擊紛紛棄營而遁傷斃約二百名朱品隆一軍前經奏明出攻石埭與鮑超會勦甯國自聞徽州之警臣調令回軍入援馳至休甯與署總兵唐義訓商

援徽之法以疏通糧路爲急十七日兩軍齊赴屯溪攻破卡壘數處斬馘約五百人賊已退遁是夜復回踞該處十九日朱品隆督以將石橋潛口賊巢節節掃蕩擒斬無算二十二日巖寺大股直撲萬安街朱品隆督軍力堵賊始卻退殺斃約三百名張運桂以巖寺街被賊堅踞糧路不通必須合力勦退密飭總兵黃萬友率隊開道馳赴休甯會商朱品隆等兜勦張運桂派隊往潛口策應二十六日我軍分路前進巖寺之賊大股出撲朱品隆從街口破堅卡而入唐義訓黃萬友前後包鈔連毀賊壘十餘座斬馘三千餘人楊逆受傷逃出餘匪退向篁墩追殺數里該逆經此重創遂於除夕向遂安淳安退去徽城各門之賊亦於二十九三十等日竄遁左宗棠一軍亦於二十六日在婺浙交界之大鱗嶺酣戰獲捷各路悍賊負創遠遁徽圍立解全境肅清所有尤爲出力各員

先行開列請旨給予獎勵 上諭徽州被圍月餘官軍內外夾擊

疊獲大捷立解城圍辦理甚爲得手此次防剿尤爲出力之總兵

張運桂著賞給彥勇巴圖魯名號朱品隆著賞加提督銜唐義訓

劉松山朱紹輝劉光明均著交部從優議敘黃萬友易開俊均著

賞加提督銜○曾國藩又奏 臣 疊奉諭旨命籌辦江浙軍務查杭

州未失之先左宗棠由徽境進援中間節節爲賊所阻未能速達

杭州更何能繞進蘇常至杭州旣失以後左宗棠於十二月杪戰

勝於徽浙交界之大鱗嶺甫解徽郡之圍擬由徽境進攻嚴州下

以扼杭省之吭上以作衢州之蔽目前謀浙之道舍此別無長策

惟行軍自有次第必須攻克開化遂安等城乃有赴嚴之路必畱

守婺源華埠等處乃無鈔後之虞 臣 前奏須俟蔣益澧一軍到衢

分途進攻非過於持重也實因賊數太多占地太廣動輒以長圍

四我若非左宗棠直擣嚴州恐衢州終困於長圍之中若無蔣益
漣續進常玉恐左宗棠亦將困於長圍之中反復籌算不得不審
慎而出至鮑超一軍與羣賊搏戰於青陽城下不能遽克即使克
復青陽尙有石埭涇縣等城爲賊所踞未能遽抵甯國又安能進
援杭湖間蘇常之賊守禦並未稍懈似尙無機可乘縱有可圖之
機而左鮑兩軍隔蘇常各八九百里必經江南十數縣有賊之地
前阻堅城後無糧路軍心一潰寸步難行臣之愚見必俟左宗棠
圍攻嚴州鮑超進抵甯國浙事方有下手之處至翁心存所奏請
臣派員馳赴通泰乘虛由江陰常熟進擣蘇常如或不能則力保
下河數百里沃壤遏賊北趨宋晉所奏請飭都興阿派兵由靖江
泰興分進江陰常州各條均屬詳慎周妥惟都興阿一軍須先肅
清江北俾後路無牽掣之虞見聞天長六合均經克復江北浦口

江浦兩城如卽乘勢攻克上可通曾國荃無爲運漕各軍之氣下可聯袁甲三臨淮滁州各軍之援則江北片段旣成根基旣固然後會合上下游分路規取南岸方不至凌躐無序自古江南用兵以鎮江爲險要目前局勢鎮江尤屬必爭之地若圖金陵則俟鮑超一軍攻克甯國後由東壩溧陽進而鎮江卽出兵會之若圖蘇常則俟揚州一軍肅清江北後由靖江泰興進而鎮江亦出兵會之是以臣前奏李鴻章統帶水陸下駐鎮江原爲將來進取地步惟鎮江見有馮子材黃彬等軍如果扼守得力不須添換李鴻章或移紮通泰或駛往上海應俟該員抵鎮後察看情形再行具奏見催該員趕緊募練淮勇並著撥浙軍數營如有火輪夾板船可雇卽由水路前進否則陸師緣北岸前進二月杪當可成行曾國荃新勇募到擬進攻巢州和州一帶通下游鎮揚各軍之氣仍固

上游無巢一面之防未便遠赴上海顧彼失此至上海餉源所出
關繫亦重或派陳士杰一軍赴滬應俟陳士杰到皖李鴻章到鎮
後續行具奏 上諭議政王軍機大臣等曾國藩奏稱遵籌江浙
軍務等語浙江全省淪陷惟衢州湖州兩府城僅存據曾國藩奏
左宗棠必應由徽境進攻嚴州鮑超須由青陽石埭等處進圖甯
國舍此則浙事無下手處諒該大臣胸有成算定合機宜惟慶端
到建甯後已令於溫處衢三路進兵其李元度一軍由龍游轉戰
前抵壽昌左宗棠自應速攻開化遂安以期與該臬司會合進擣
嚴州蔣益澧由粵赴浙程途較遠是否必應守候抑或別有勁旅
可籌仍著該大臣等酌量辦理前因上海喫緊據都興阿奏請飭
馮子材赴滬茲據曾國藩奏李鴻章於二月杪即可赴鎮曾國荃
未能往滬或俟陳士杰到皖後飭令前赴上海見已諭知馮子材

俟李鴻章到後再行酌量赴滬上海鎮江兩城均關緊要如陳士杰到滬可期得力則馮子材仍畱鎮江藉資熟手較有裨益卽著曾國藩行知該提督等遵辦鎮滬情形均極孤危必得陳士杰李鴻章及早起到方可保全鮑超進攻甯國之師曾國荃進攻巢縣和州之舉均著該大臣等分別檄催勿可遲緩前據薛煥奏江浙紳士呈請借用西兵剿賊當因上海危急諭令該撫酌辦此時總理衙門與英法公使相商亦惟以上海係通商之地外國應協助中國防守並未令其助剿蘇常該大臣所陳與見辦情形實相脗合至購買外國船礮或能辦有頭緒該大臣務遵前旨將應配官兵早爲籌備以免臨時掣肘曾國藩另片奏疊荷殊恩未敢懇辭並請慎舉措大權等語昨因華日新開缺已將曾國荃補授江蘇布政使並諭令毋庸回避該大臣以屢被恩施自陳惴慄極見古

大臣風範惟以軍務方棘該大臣但能視國如家俾疆事日有起色則朝廷名器應以酬庸亦非有私於該大臣也舉措之權固應操之自上惟能容能保相臣之責該大臣果有所知仍著直陳無隱以備採擇將此由六百里各諭令知之○諭前因京口防務喫重諭令馮子材毋庸赴滬仍畱鎮江督辦防剿茲據該提督奏已派副將黃武賢先往上海布置並擬帶常勝等勇一千餘名赴滬鎮防見雖稍鬆而逆謀甚狡且慣能乘虛難保不再圖大逞該提督若將得力弁勇全行帶滬鎮城卽形空虛殊爲可慮都興阿一軍見須分守天六等處並派援清淮兼顧裏下河一帶恐於鎮防未能專力籌辦上海自松江大捷後情形較鬆著馮子材仍遵前旨暫緩赴滬俟李鴻章到鎮後酌度情形再降諭旨將此由六百里加緊諭令知之○戊午諭議政王軍機大臣等鄭元善奏大股

毫捻西竄杞境經僧格林沁督軍追剿獲勝見在親率省防馬步
兵勇扼紮陳畱相機進剿一摺僧格林沁駐軍單縣此時間由豫
境歸德一帶進剿毫捻是否該大臣前敵之軍抑係親督大軍前
往毛昶熙之兵駐紮歸德該捻由毫東竄至甯陵等縣何以先事
毫無豫備臨時始行調隊迎剿見在僧格林沁之兵已至杞縣攻
賊之後而歸德陳州又有毛昶熙勝保之兵鄭元善復在陳畱堵
截該匪攻撲村墟想因官兵三面緊迫之故見在如能剿洗淨盡
固可一勞永逸儻兜圍不密鋌而走險恐其由考城一帶乘虛北
竄僧格林沁是否尙在曹單該處有無大隊可以堵截鄭元善駐
兵陳畱其通許一帶有無防守能否遏截西竄均著面商到毛
昶熙駐守杞城仍應選派勁旅出城會合夾擊一面飭令歸德軍
營嚴密防剿並著勝保由陳州調撥得力兵勇遏賊南竄之路賊

勢西面喫重省城防務著鄭元善妥籌兼顧毋稍疏懈將此由六
百里各諭令知之○諭毛鴻賓奏追剿石逆獲勝並克復來鳳縣
城各摺片石逆久蓄狡謀垂涎川省既不得逞於湘鄂之交勢必
由黔江西秀一帶西竄前經寄諭駱秉章會合田興恕派兵兜剿
著仍遵前旨併力以圖務使該逆不得闌入蜀疆致滋延蔓朱凌
漢之軍前據田興恕奏飭往思渠龔灘等處是否川黔要隘爲賊
勢所必趨著卽妥爲調度毋致與賊相左駱秉章曾否調派川省
官軍先期備豫並著將布置各情迅速馳奏毛鴻賓所派入川堵
剿各軍仍著督飭趕緊進發該逆積年巨愆刻下勢當窮蹙首當
絕其入川之路合三省兵力聚而殲旃不可稍失事機也將此由
六百里各諭令知之○諭英桂嚴緝山西馬賊○諭耆齡等詳查
福建捐務積弊○予湖北陣亡巡檢秦熙鄴祭葬世職○己未諭

內閣前因曾國藩奏參前任安徽巡撫翁同書棄城逃遁等情降旨將翁同書革職拏問交王大臣九卿會同刑部秉公定擬罪名具奏茲據王大臣定擬罪名並鈔錄翁同書親供一併呈覽翁同書當定遠失守時雖督兵在城外勦賊惟身任封圻不能激勵兵勇固守城池以致被賊攻陷已屬咎無可辭前經部議革職蒙

皇考文宗顯皇帝加恩改爲革職畱任宜如何感激圖報乃退守壽州以後辦理多未妥協致有紳練仇殺之事該革員雖已交卸撫篆惟係奉有諭旨畱守壽州又不能嚴密守禦力保危城迨

壽州城池被陷後奏報情形前後復自相矛盾實屬貽誤地方厥

罪甚重翁同書著卽照王大臣等所議斬監候秋後處決○以崇

厚爲內閣學士由大理寺卿遷○庚申諭內閣前因全慶承審已革大學

士柏葑科場一案不能悉心覈議輒附合載垣等妄擬罪名聯銜

入奏降旨將該尙書交都察院議處茲據都察院奏稱例載審斷失入若錯擬已決者承審官革職又徇隱例降二級調用各等語此案雖係由載垣等擅作威福深刻定罪非全慶一人之意惟以承審大員定案時不能悉心覈議輒行附和成讞若僅照徇隱例降二級調用實屬輕縱全慶著加恩免其革職照議降四級調用以示薄懲○諭議政王軍機大臣等勝保奏分路剿賊獲勝並粵捻各逆分犯豫疆各摺片亳州捻逆糾合匪眾直奔陳州經官軍擊退後另股又竄至馮塘新站等處新蔡亦復被圍雖杞捻眾經僧格林沁剿敗後回犯陳州該郡三面逆氛環逼其軍情緊迫自係實在情形惟毛昶熙帶兵扼紮歸德曾有毫捻巨患臣自當之矣何以此次捻眾西竄未見該學士派兵堵遏即使毛昶熙阻斷在杞營中將弁竟不援救緩急更何足恃該學士敢爲大言臨

事毫無實際已可概見見在業已回營卽著派兵痛勦儻仍不能
得力必將毛昶熙治罪勝保駐紮陳州原爲居中調度前奏省城
有警分兵兼顧見在何以不能分勦西竄捻逆亦未將項城新蔡
一帶匪眾實力掃蕩僧格林沁赴豫之師未必能厚尙能勦敗西
竄大股捻逆可見實心辦事自必立收成效也該親王扼紮鄆單
南援清淮兼顧豫省兵力亦以分而見單勝保請俟僧格林沁擊
退杞縣股匪後卽駐紮歸德睢杞之間爲會擣蒙亳之計如鄆單
尙須兼顧卽選馬隊一二千扼紮鹿太爲勝保後路策應是否可
行著僧格林沁酌量辦理勝保務當就見有兵力妥爲籌勦不得
以兵單餉絀藉詞諉過潁郡被圍已久李續宜前調赴援之成大
吉一軍見在行抵何處卽著催令前進西安馬隊到豫暫畱勝保
軍營惟豫省餉項是否足敷支應著鄭元善酌量具奏汴城兵力

甚單見在雖可無虞鄭元善仍著妥爲兼顧毋稍疏忽前有寄勝保撫安苗沛霖諭旨一道於見在辦法已不相符著卽繳回將此由六百里各諭令知之○辛酉諭內閣沈兆霖奏查明撤匪滋事大員不實力勦辦捏稱悔罪投誠致該匪仍肆侵掠並查明樂斌被參各款定擬罪名各一摺西甯辦事大臣多慧解任甘肅提督成瑞力主撫議縱匪殃民多慧尤屬始終回護均著卽行革職交刑部分別定擬罪名具奏署西甯道候補道和祥輕撤團勇致百姓受害甚慘署西甯府知府朱百川卽補參將趙秉鑑署巴燕戎格達擊楊玉芳通判鄭聲文阿附上官愆愆遷就且於札傳首逆多玩不遵實屬咎無可辭均著卽行革職解任陝甘總督樂斌於處庸多慧捏報戰功不能確查迨多慧具摺濫保請獎輒隨同列會入奏其爲有心庇護顯而易見其被參納賄營私各款雖查無

實據惟失察使妾與屬員之妻往來復以候選知縣爲幕友屢爲
保奏並於家人等盤踞把持不能覺察以致聲名狼藉實屬昏庸
乖謬有心欺飾據沈兆霖奏請革職不足蔽辜樂斌著卽行革職
並發往新疆效力贖罪其先後調兵動用庫款銀兩寶鈔捐款錢
文均屬虛糜帑項卽著樂斌多慧成瑞和祥分成賠繳候補知府
章桂文雖查無營謀賄求情事惟其妻往來督署實屬不知檢束
捐納知縣同知銜彭雨亭卽彭沛霖雖無招搖撞騙確據惟以候
選知縣盤踞督署復乘坐四轎擅用站車均屬有干例禁章桂文
彭雨亭卽彭沛霖均著卽行革職章桂文仍從重發往新疆效力
贖罪彭雨亭卽彭沛霖仍從重發往黑龍江充當苦差家丁陳四
卽陳菊莊苛索滋擾不安本分書吏余奎卽余魁先以犯案擬徒
復圖結交官府不知悔改僅予枷杖不足蔽辜陳四卽陳菊莊余

奎卽余魁均著從重發往黑龍江充當苦差○諭議政王軍機大臣等撤回於上年官兵撤回後勢甚鴟張亟應痛加懲創俾知畏懼沈兆霖前奏調派官番各兵分道圍剿俟剿洗一二回莊匪眾瓦解然後責令擒獻首惡等語所籌甚是見在調集弁兵是否業經進剿馬丕三曾否到案如該匪經官軍痛剿果能震懾兵威畏罪投誠卽當迎機轉圜妥籌收撫孔廣順帶兵素稱得力本日已降旨令其署理甘肅提督應如何商令帶兵進剿之處著沈兆霖相機辦理將此由四百里諭令知之○調瑞常爲吏部尙書以寶鋆爲戶部尙書調阜保爲戶部左侍郎察杭阿爲兵部右侍郎以增慶爲理藩院右侍郎○壬戌諭議政王軍機大臣等李世忠奏浦六旣復請飭撥兵進駐並該提督軍營更多餉絀懇飭籌撥接濟及請調礮船以通糧道各摺片李世忠一軍克復江浦浦口兩

城該處爲江北門戶與金陵一江之隔距九洲不過數里據該提督奏稱察看形勢統計各處防軍總得萬二千人之數及調礮船數十隻扼紮江邊以通糧道九洲四面臨江非水師不能進攻請由江北調派紅單戰船二十隻及小礮船數十隻駛赴浦口以資調遣見在江浦烏江橋林被賊圍攻軍士日夜鏖戰糧食軍火均乏其勢甚危請飭迅卽調派等語所奏籌畫各情尙屬詳明李世忠之軍分守各城兼籌進剿不敷周轉若再增兵又恐餉需難繼天六本係江北切要地方仍著都興阿撥兵駐守以便李世忠所部移紮江浦浦口兩城以資周轉天六屏蔽淮揚而江浦與金陵濱江對峙爲形勢所必爭該將軍提督等務當竭力和衷以期共濟毋得稍存成見致誤事機揚州防務稍鬆江北兵力自應足資調撥都興阿務卽選派得力將領與李世忠商同設法守禦

並著與吳棠會同酌量於黃彬等所帶兵船迅卽分撥浦口以通糧道而資堵剿江面賊氛中阻必須上下游師船合力埽蕩著曾國藩迅籌水軍進剿之策彭玉麟之軍能否卽行駛下楊載福假期早滿自應迅速回營與彭玉麟前後互爲策應李世忠與楚師大隊僅隔和含並著曾國藩水陸通籌設法聯絡以爲埽穴犁庭之計至李世忠部下人數眾多前經諭令吳棠袁甲三等力籌接濟茲據該提督奏見在天六等城所收降眾又增七千餘人所費愈益不支仍著吳棠督飭喬松年等實力速籌每月協撥李世忠軍餉銀若干萬兩以資接濟李世忠所籌旣自稱俱有把握諒非徒託空言仍著與袁甲三會商於戰守一切務臻妥善其軍情奏報等件仍應稟商袁甲三聯銜入告以一事權將此由六百里各諭令知之○諭據譚廷襄奏赴豫降眾張玉懷等折入朝城經明

慶等押令過河渡河南行後旋復折回於本月初二三等日以湊集盤費爲詞遂漸北趨冠縣等語直東降眾本不足恃愚諭勝保妥爲防範嗣經該大臣調赴皖豫卽有變計思歸之奏昨又奏稱沿途會圍截殺所餘無幾何以尙有張玉懷等仍赴冠縣此事關係直東防務豈可飾詞具奏該降眾等本應駢首免其一死給以口糧令其隨征自效已屬法外之仁見在仍復折回諒因河套中尙未肅清意圖勾結滋擾卽使勉強押令南行非獨不能得其死力更恐緩急之際變生肘腋莫若乘此尙未顯然背叛之時四面截殺免貽後患卽著僧格林沁譚廷襄遮克敦布等不動聲色斟酌辦理明慶所帶馬隊五百名雖因陳州喫緊調回第此事勝保辦理不善咎無可辭豈可因已離直東卽不思力圖補救仍著勝保飭令該副都統駐紮冠縣與王榕吉等妥商籌辦務期將此股

降眾辦理妥協再行南下譚廷襄另片奏蘭山等處剿匪情形等語東省西路雖有僧格林沁大兵駐紮而東南尙形空虛德楞額一軍如可折回卽令扼紮嶧縣幅匪竄及莒州該處爲入青萊之路尤應嚴爲堵禦卽著譚廷襄飭沂州青萊等屬文武紳團並咨青州副都統一體協同堵剿毋任蔓延將此由六百里各諭令知之○祁寓藻以病乞解部務慰畱之免其帶領引見並應派差使○癸亥諭內閣朕奉 母后皇太后 聖母皇太后懿旨前因從征將士兵勇歷次陣亡者其子孫甚可憫念諭令各原籍地方妥爲撫恤因思軍興以來封疆將帥之臣或懋著勲勞運籌規畫或轉戰數省保障名城雖盡瘁捐軀所遇不同要皆誓志滅賊終始不渝前已疊經贈官廕襲賜諡建祠飾終之典備極優隆緬維先帝在日論及諸臣精忠壯節時時揮涕今新政頒行事事仰體

先帝之心諸臣以死勤事九原可作遺徵猶在能不愴懷因諭議政王軍機大臣查明諸臣死事情形擇其戰功卓著忠績懋昭足以表式人倫者開單呈覽茲據查開進呈詳加披覽實皆勲績卓然爲我國家忠良死節之臣允宜再沛恩施以示軫念江甯將軍祥厚西安將軍札拉芬湖廣總督吳文鎔江蘇巡撫吉爾杭阿浙江提督鄧紹良直隸提督史榮椿樂善江南提督張國樑浙江布政使李續賓江西按察使周玉衡鑲白旗滿洲副都統達洪阿京口副都統綢關副都統佟鑑伊興額肅州鎮總兵雙來通永鎮總兵虎坤元戴文英南陽鎮總兵邱聯恩徐州鎮總兵滕家勝甯紹臺道羅澤南署廬鳳道金光飭候補道溫紹原延建邵道趙印川記名道蕭翰慶黃滔熙候補道劉存厚知府謝子澄均著各賜祭一壇安徽巡撫江忠源道員江忠濟提督周天受周天培總兵

長瑞長壽均係兄弟歿於行陣長瑞長壽之父塔思哈道光年間亦在喀什噶爾打仗陣亡湖北按察使李卿穀安徽布政使李孟羣父子殉節九江鎮總兵馬濟美三世殉難念其忠烈萃於一門尤堪憫惻湖北巡撫胡林翼湖北提督向榮湖南提督塔齊布記名按察使蕭啟江記名道王鑫未收全功遽就溢逝迹其功勳卓越名播寰區至今江鄂士民猶能稱頌歿於王事憫念良深並著各賜祭一壇以上賜祭各員著該旗都統原籍督撫派委參佐道府大員前往各該員家祠賜祭其有未經予諡者著禮部查明加恩予諡以光泉壤前任內務府大臣文豐從容赴難不愧完人並著賜祭一壇加恩予諡此外大小員弁紳團兵勇人等爲國捐軀雖經隨時議卹恐湮沒者尙多殊無以慰忠魂而作士氣著各路統兵大臣地方大吏訪查具奏毋稍遺漏以備交功臣館纂入列

傳用副篤念忠節至意○諭勝保奏擒匪圍攻前敵各營剿擊獲勝並克楊樓賊壘等語逆匪陳大禧糾合各路逆捻圍攻勝保前敵各營經河南藩司張曜庶吉士吳元炳副將楊飛熊等分路進剿將新設賊卡兩座平毀復整大隊進攻楊樓賊壘匪眾死拒張曜揮軍填壕搶進殺斃悍賊無數立將賊壘攻破辦理洵爲得手著卽飭楊飛熊等迅卽乘勢進剿將該匪悉數埽蕩所有出力員弁兵勇准其會同鄭元善擇尤請獎○諭議政王軍機大臣等前因鄭元善奏毫捻西竄杞縣經僧格林沁督軍追剿獲勝本日復據勝保馳奏探報北路巨捻三四萬人圍攻杞縣經僧格林沁毛昶熙派隊出剿屢戰未退等語僧格林沁軍報未至已浹兩旬殊深懸系之懷節據鄭元善勝保所奏是該大臣已身入杞縣與毛昶熙同在圍中單縣距杞不遠大營兵勇爲數尙多務卽撥調赴

援如能迅解城圍與豫營兵勇會合痛勦固屬不可失之機萬一賊圍已合其勢披猖卽當與毛昶熙分籌戰守毛昶熙激勵民團督飭該縣文武將守禦事宜力籌穩固僧格林沁飛調勁軍能卽力戰衝圍突出不惟大軍駐單得所主張亦可與鄭元善陳畱等軍聲氣相通設法調度斷不可專一困守危城爲賊牽掣鄭元善進駐陳畱務與僧格林沁毛昶熙設法會合內外夾攻以解城圍余際昌之軍已到應卽先其所急飛調赴杞援應譚廷襄昨奏亦稱僧格林沁移軍追賊已至杞縣著卽飛探如杞縣之圍勢難衝突卽著該撫會商國瑞等趕緊調撥策應毋稍延誤至曹單之防亦須兼籌不可畱兵太少顧此失彼將此由六百里加緊各諭令知之○諭勝保奏援潁諸軍已馳抵太和卽日親赴前敵相機援剿並查明降眾疑懼思歸沿途並無騷擾見已知悔情願跟隨效

力各招片道員洪貞謙總兵成祿業經督率前隊馳抵太和會同署臬司黃元吉號召民團收撫各圩以助官軍援穎其沙河南岸及穗子鋪等處亦經勝保派令閻進升等帶隊堵剿惟賊股甚眾處處牽掣必須盡力奮擊方可開通道路勝保擬卽日親督馬步馳赴槐店並督飭該鎮道等由劉家集等處滾營前進節節掃蕩迅解穎圍卽著照所議迅速辦理毋稍遷延至賈臻所稱張落刑盤踞潁上未動苗沛霖有先拔潁上後解穎圍之約等語苗沛霖如果決意歸正必將張落刑殲除再行進解穎圍始可明其心迹若僅虛張聲勢派練赴援安知不與張落刑暗地串通遂其故智勝保斷不可墮其術中致貽後患僧格林沁等被圍在杞亟應設法援救勝保督辦皖豫剿匪事宜責無旁貸著卽受籌援剿如有疏虞惟勝保是問這回降眾能否馴順尙未可必仍令前赴勝保

軍營交該大臣嚴行鈐轄斷不可令其隨同明慶赴杞致有他虞至周士鍵兄弟平日聲名本屬惡劣復經嚴樹森參劾是以降旨將該員革職逐出軍營勝保何得不遵詔旨擅自畱營調遣如各路統兵大臣紛紛效尤於明奉諭旨之件違抗不遵尙復成何事體仍著勝保恪遵前旨將該革員迅卽逐出勿得徇情容隱將此由六百里諭令知之○諭慶瑞奏遵旨會商進剿情形一摺據稱建甯北可顧衢東可兼顧處溫兩路催兵籌餉調度較靈因仍暫時駐紮第扼賊入竄似以浦城爲切近該督仍應詳定駐紮之所總以勢扼建瓴力圖克取爲要總兵林文察一軍前據該督奏稱擬令進攻處州何以此次又令進攻遂昌該處距龍泉不遠林文明所募臺勇已到自應飭令就近進攻其林文察一軍由松陽進攻處郡如此兩路並進則逆匪不暇分援或可剋日攻克著慶瑞

咨商左宗棠斟酌辦理秦如虎一軍卽飭進紮温州曾元福所募
臺勇著卽催令星夜趨行進紮衢州由左宗棠就近調遣副將吳
鴻源水勇前諭駛赴上海儻滬防已足敷布置迅速飭令會同顏
青雲援浙水師進攻甯郡曾玉明卽督帶續到臺勇繼進不可延
誤該督數月以來並未見克復一城辦理亦無定見見在賊氛徧
地固當步步爲營不可輕進儻事亦宜力求實際以勦爲防該督
以獲咎人員若再粉飾誤事自問應得何罪本日該督以布置空
言由六百里加緊馳奏徒駭聽聞甚屬不合嗣後務與左宗棠會
商非有緊要軍情不得率行由六百里加緊馳奏將此由六百里
諭令知之○甲子諭內閣工部尙書倭仁呈進所輯古帝王事蹟
及古今臣工奏議二帙洵足資啟沃而紹心源著賜名啟心金鑑
並將此書陳設弘德殿以資講肄○乙丑 上詣至聖先師前行

禮御弘德殿升座受惠親王恭親王師傅諳達御前大臣內務府大臣禮上揖師傅入座讀書自是以爲常○僧格林沁國瑞鄭元善毛昶熙奏臣僧格林沁於正月二十一日據虞城商邱各縣稟稱毫東捻匪五旗並出欲由虞城西竄豫境當與臣國瑞飛調住紮碭山馬良集及單縣之馬隊於二十二日馳赴曹縣劉口地方會齊旋據探報該逆已由甯陵竄至睢州我軍於二十四日追至睢州該逆已西竄杞縣卽督帶各起馬隊向杞縣追剿午刻至許岡地方各股捻匪列仗相拒馬步橫互十餘里經署翼長蘇克金等督隊衝壓該逆紛紛敗退乘勢追殺數里屍骸滿野餘匪竄入廢塞忽有西路大股逆匪結隊來援我軍分路衝擊賊始退卻共計是日殺賊約有二千餘名天晚始行撤隊在杞縣迤東四里駐紮適臣毛昶熙由省馳回歸德二十三日方至杞縣賊眾已至

當派都司蔣學耕等帶領隨行馬勇衝出賊陣馳赴甯陵飛調遊擊陳祿興所帶馬步全隊來杞以資剿擊一面嚴布城防二十五日臣僧格林沁入城與毛昶熙會商剿辦所帶馬隊皆令環布濠邊助守二十六至二十八日各股捻匪分擾四關勢甚猖獗臣僧格林沁臣國瑞臣毛昶熙督率員弁開放槍礮併力防守並屢次縋城出擊連日皆有斬擒賊始退去在隄外各村盤踞臣僧格林沁自入杞城卽欲遣隊出剿因連日大風揚沙咫尺莫辨且自龍門口追賊轉戰數百里人馬飢疲難以接仗經臣毛昶熙多方籌濟軍食休息三日兵氣大振二十九日該逆復來攻撲臣僧格林沁派馬隊豫伏濠邊故作不出之狀迨該逆將欲撤隊歸村急令馬隊暗由小西門齊出直撲東南史莊馬樓等處賊營該逆倉卒來迎我軍奮力衝殺匪勢不支向東逃竄遂踏平賊營七座斃賊

千餘名追殺十餘里天晚撤隊回城

臣

鄭元善扼紮陳畱適所調

余際昌一軍前來當令楊長春所部楚勇三千名會合進剿一面

約會

臣

僧格林沁由杞派隊前後夾擊初一日

臣

僧格林沁蘇克

金統帶馬隊進剿縣西陳敏屯一帶捻股適余際昌等軍趕到該

逆見我馬步齊至不敢交鋒避入圩內難以驟攻而東北田陵寨

賊匪西來接應蘇克金等馳往截剿將賊衝爲兩段乘勢掩殺賊

眾棄械狂奔我軍追殺十餘里計斃賊二千餘名餘匪入寨死守

不出初三日復派蘇克金等馬隊余際昌等步隊往剿趙寨賊圩

余際昌楊長春身先士卒越濠而過我軍一擁入寨賊眾驚散經

馬步各隊痛殺共計斃賊四千餘名此圩悍賊殲除淨盡蘇克金

余際昌等復令各隊馳赴焦寨賊圩併力圍攻忽田陵寨之賊全

股來援寨內之賊亦拌命殺出蘇克金等率馬隊馳禦援賊余際

昌等率步隊追殺寨內竄賊分投奮擊蘇克金等將援賊追散會合余際昌等追殺焦寒竄匪是日鏖戰四時之久共計殺賊八九千人該逆喪膽乘閒宵遁沿途復經各圍掩殺斃賊不計其數敗殘餘匪皆折回西南由通許一帶敗竄臣僧格林沁臣國瑞於初四日統領馬隊馳赴陳畱與臣鄭元善會商後立即拔營前進臣鄭元善以省兵盡銳東出根本空虛即督小隊於是日旋省布置要隘以防回竄一面知會臣毛昶熙督率在杞各營步勇回顧省防兼爲臣僧格林沁大軍後路策應並探明賊蹤所向如被擊回竄臣毛昶熙仍督所調宋營馬步隊即日馳回歸德截賊歸路上諭議政王軍機大臣等捻匪以大股竄入豫境圍攻杞縣經僧格林沁督兵馳至會合鄭元善派出官軍痛加剿洗賊眾大受懲創遂向通許逃遁該大臣即由陳畱督兵追剿實屬公忠體國勇

往無前毛昶熙鄭元善接濟軍食合力會勦覽奏均深嘉悅該匪被擊西竄難保不蔓及鞏洛窺伺山陝鄭元善見已回省將防務妥爲布置仍著調派得力官軍探明匪蹤迎頭前進與僧格林沁大兵會合夾擊毋任再得西竄見在汝甯捻逆未平設與此股竄捻勾結則勝保有四面受敵之慮該大臣前奏擬卽赴太和力圖援潁仍著調派一軍馳赴通許等處與僧格林沁等軍合力兜勦使該匪不得進逼陳州方爲妥善該匪被勦窮蹙自必仍由宋郡回竄卽著毛昶熙速行馳還歸德扼賊歸路爲一鼓殲殲之計儻該逆實有竄突西路之勢則暫且截令歸巢徐圖進剿未始非策著僧格林沁等相機妥辦前據僧格林沁奏捻逆誘我出擊將圖北犯實能洞燭賊情此時國瑞已隨該大臣入豫德楞額復往東路追剿清江一帶捻匪曹單等處係派何員駐紮能否獨當一面

所留兵勇是否足敷鎮守均著僧格林沁妥爲籌畫毋致顧此失彼並著譚廷襄將該省防剿事宜與僧格林沁隨時會商悉心經理直東交界防務係遮克敦布等專責並著與王榕吉實力籌辦毋稍疏忽豫省一經肅清直東邊防復能鞏固則僧格林沁即可進擣蒙亳老巢以期一勞永逸惟在該大臣等同心協力迅奏膚功是所殷盼將此由六百里各諭令知之○駱秉章奏前因石逆竄近龍山圖與來鳳之賊合股楚師跟蹤躡剿勢將偪入川境疊次請調臬司劉嶽昭一軍馳至川東豫爲布置並催知縣易佩紳新募楚勇速抵夔郡以固巖疆乃劉嶽昭一軍旣爲湖北留防施南易佩紳所部復代楚南扼守龍山要隘不能卽至臣以川中無兵可援西陽門戶喫緊復派候選道章源募勇千名馳往西陽一帶調集團練練險爲防旋據署西陽州知州王麟飛稟報石逆竄

入來鳳縣城並分股出擾西陽兵圍連日進剿獲勝已於正月初九日隨同楚師將來鳳縣城克復該逆盡向東南兩山奔竄臣度該逆窺伺西陽黔江屢經挫衄勢必由利川圖竄夔郡遂飛檄易佩紳速率全部並調湖南在籍道員席寶田總兵周達武所帶楚勇馳赴利川所屬之輓耳箐白水溪要隘以杜該逆奔突適據署夔州府知府顧開等來稟該逆前隊竄至咸豐之忠堡一帶並有馬隊二千餘眾繞過黑洞卡直撲利川是奉節雲陽萬縣等處在在宜防查川中兵勇及湘果護軍各楚營正值分剿青神鐵山滇匪果毅嚮導兩軍又復追剿周曹郭張諸逆兵力實難抽撥見復檄催易佩紳席寶田周達武各率所部迅速鈔截賊前並飛咨貴州提臣田興恕將前經調防彭水黔江之副將朱淩漢總兵李有恆楊巖寶各軍如西陽黔彭防剿稍鬆卽改赴雲陽萬縣一帶又

飛催劉嶽昭所部亦卽星夜馳赴夔郡合力堵剿惟楚師已落賊
後黔軍又難計程而至賊勢逼近除由臣咨調黔楚各軍並嚴飭
夔郡文武地方官厚集團練豫爲防堵外仰懇 皇上飭下湖廣
督臣湖南貴州撫臣速飭臣所調各營兼程並進並飭湖南北各
路得勝之兵併力進剿合三省之師殲此巨寇不但完固川疆免
被蹂躪卽兩楚亦可一勞永逸得息征調馳逐之煩藉以仰慰

聖厪 上諭據駱秉章奏石逆逼近川疆請飭催黔楚各軍合力
堵剿等語石達開經楚軍擊敗克復來鳳縣城後餘匪竄至咸豐
直撲利川圖竄夔郡川省在在戒嚴前據毛鴻賓奏漏網之賊不
過三四十已狼狽不能成軍復能收合餘燼直逼川疆以窺夔萬
實爲兇狡川省兵力不敷恐其深入腹地自應合四省兵力翦此
巨寇著官文嚴樹森卽飭劉嶽昭一軍星馳赴夔竭力防守易佩

紳一軍前據毛鴻賓奏已剋日拔營赴援著卽飭令迅赴夔郡並
飭在籍道員席寶田總兵周達武帶勇馳赴利川一帶偵賊所向
實力兜剿川疆旣固卽兩楚亦可一勞永逸保川卽以保楚諒官
文等必能洞燭事機不至稍分畛域也其田興恕派出之副將朱
淩漢總兵李有恆楊巖寶各軍已撤赴思渠龔灘等處著酌量情
形如秀酉黔彭防務稍鬆卽令改赴雲陽萬縣一帶會合楚軍併
力夾擊賂秉章亦飭川東鎮道督率兵勇會合三省勁兵前後堵
擊並嚴飭夔郡文武厚集團練妥爲守禦毋稍疏懈將此由六百
里加緊各諭令知之○諭僧格林沁等奏會剿大股捻匪大獲勝
仗並據賂秉章奏石逆大股逼近川疆請飭黔楚各軍入川助剿
各一招毫捻大股竄至杞縣經僧格林沁督帶馬隊會合鄭元善
毛昶熙兵勇痛加剿洗屢獲大勝該逆糾合餘黨向通許一帶西

竄僧格林沁見帶馬隊追擊此股捻匪因恐僧格林沁進兵毫境
擣其老巢欲由豫省竄入陝疆另圖巢穴見雖被創奔逸而蹤迹
飄忽日向西趨毛昶熙一軍因歸德防堵緊要未能盡力西追鄭
元善因汴梁空虛業已折回省垣僧格林沁馬隊爲數無多見雖
追賊西至通許又須兼顧東省曹單一帶設賊勢日趨關陝恐僧
格林沁一軍未能捨豫東邊防悉力窮追所有陝省毗連豫疆之
潼關商雒各隘口自應早爲設防以資堵禦著瑛棨調派兵勇嚴
密堵扼並著張芾聯絡鄉團以助聲勢儻遇該匪竄至卽行會合
截擊毋令竄入邊境至石達開股匪業已逼近川境駱秉章見催
黔楚各軍入川繞截該逆蹤迹飄忽恐因川楚各軍堵剿嚴密折
向陝境老林致剿捕又形費手著瑛棨張芾於興安定遠兩府廳
境內毗連川東各要隘嚴密設防妥爲籌布毋得以賊蹤尙遠稍

存大意將此由六百里諭令知之○廣湖南岳州府平江縣學額

各十名○丙寅實授劉蓉四川布政使○以毛震壽爲陝西布政

使牛樹梅爲四川按察使

由前四川候補知府遷

○丁卯曾國藩奏

臣歷奉

諭旨垂詢諸事謹分條詳對於後一曾國荃新募之勇據報正月二十前可以招齊二十四日自湘起程由水路東來二月底可抵安慶俟到安慶卽令其進攻巢縣和州含山等處能破此三城則與下游六合揚州聯爲一片毫無阻隔矣楊載福本應臘月銷假回營因辰沅告警地方官紳請楊載福代守乾州廳城因此羈延至今尙無起程確信臣已三次飛催屬其於二月回營張運蘭前因病離營因徽州被圍催令力疾就道卽日將抵安慶可回徽營矣一李鴻章一軍於臘底正初招募淮勇五營另撥鄉勇數營趕緊訓練二月可以成軍本擬由水路駛赴鎮江因民船不能直衝

賊中洋船又不肯雇載兵勇不得已仍須從陸路行走由巢縣和
含賊中經過亦極可危應俟曾國荃一面圍攻巢含李鴻章一面
傍城衝過衝至和州以下則出六合江浦以達於鎮江毫無梗阻
矣一去年攻克無爲運漕東關等處本可乘勝直擣巢縣梁山進
圖金陵近日袁甲三一軍攻克天長六合江浦浦口尤有直薄金
陵之機方今東南糜爛臣等孰不思直攻老巢擒渠埽穴惟用兵
之道可進而不可退算成必兼算敗與其急進金陵師老無功而
後退何如先清後路腳跟已穩而後進所有進兵金陵之次第以
臣愚計之多隆阿一軍應俟攻克廬州而後可進曾國荃一軍應
俟攻克巢縣含山和州西梁山而後可進袁甲三李世忠一軍應
俟會克廬州守定六合而後可進都興阿一軍應俟守定揚州浦
口而後可進彭玉麟楊載福之水軍應俟攻克裕谿口西梁山而

後可進欲拔本根先翦枝葉仍須計算各路遊擊之師數倍於金陵圍城之師庶幾無撤回之虞擬卽以臣議商之袁甲三都興阿等是否有當恭候訓示遵行一潁州圍城之賊李續宜業經奏派成大吉蕭慶衍兩軍赴援據報正月二十六日自霍山起程惟繞道固始計程四百七十里途次無米可買恐到潁不能迅速但求潁城堅守月餘勝保救之於北成大吉等援之於南必可立解重圍李續宜所部之兵畱三支駐守湖北分防襄陽德安麻城等處以兩支赴援潁州以一支防守六安此外親兵帶來安慶者亦無幾矣一謀浙之道保廣信之糧路以守衢州保徽州之後路以攻嚴州舍此二者別無良策左宗棠駐紮開化境內在篁岸馬金嶺等處疊次獲勝卽日進攻遂安等縣係從衢嚴之間下手惟徽州歙績二縣羣賊又復麇聚我方圖入浙境賊乃圖犯江皖春夏間

必爭戰不休也湖州海甯久無信息鮑超聞攻青陽未下不能遽
及甯國之境又豈能遙通湖州之信徒深憂灼耳一江蘇軍務自
金山奉賢南匯川沙失守後上海已岌岌可危至今月餘歸然幸
存蓋髮匪不敢與洋人驟樹大敵上海僻處東隅論籌餉爲要區
論用兵則爲絕地再四思維擬暫資洋人協同保護將來果派何
軍前往防守之處應俟李鴻章到鎮陳士杰到皖再行察看奏明
辦理 上諭議政王軍機大臣等曾國藩奏遵覆通籌全局並將
寄詢各事分條詳對一摺前因該大臣奏報稀至耽懷南服塵念
殊深是以寄諭垂詢茲據瀝陳不欲以未定之事豫計之說及謠
傳等件遽行入告係屬敬慎將事曾國藩自前次寄詢之後業已
於正月二十三日二月初四日兩次奏到軍務各情已屬不爲稀
少此次奏稱嗣後擬定十日奏事一次有警則再加班轉覺近於

拘滯况軍營奏報向無定期其疏數每視乎軍情之緩急該大臣仍當毋失常度事事力求實濟以副倚畀之專當此東南時事孔棘該大臣但能將辦理各情隨時入告已足紓朝廷廩系正不必變更前轍再定章程也至所對進兵金陵次第即可咨會袁甲三都興阿等妥籌辦理毋庸每事必待奏請轉虞稽延本日據都興阿奏到遵飭詹啟綸所部進紮六合另派數營駐守天長俾李世忠所部進移江浦浦口兩城籌剿九洲賊壘仍著曾國藩催督多隆阿速克廬州曾國荃一軍節節進圖巢縣和含梁山以與江北江甯等軍會合並飛催楊殿福回營與彭玉麟合謀水軍進駛之策李鴻章招募各營若由陸路經行巢縣和含恐多阻滯聞上海官紳有雇就洋船該大臣卽咨商調取或隨處雇取以利軍行總使李鴻章之軍能速抵鎮江方爲妥善上海僻處海隅情形岌

戔節經薛煥奏到英法兩國協同戰守並有米人華爾於松江與賊接仗甚爲出力總理衙門亦與各國駐京使臣熟商勸導協力守禦尙形踴躍惟能暫而不能常漚瀆餉源較裕一俟李鴻章到鎮陳士杰到皖後卽須撥派勁軍往守以保萬全曾國藩此摺所奏俱屬實在情形聲敘亦極清晰原摺存畱備覽將此由六百里諭令知之○諭曾國藩奏通籌全局一摺據稱進兵金陵次第應俟多隆阿一軍攻克廬州曾國荃一軍攻克巢縣和州含山西梁山袁甲三李世忠一軍會克廬州守定六合都興阿一軍守定揚州浦口彭玉麟楊載福之水師攻克裕溪口等處而後可進等語籌畫甚是穩妥見在曾國荃新募之勇計日可抵安慶曾國藩擬俟該藩司到皖後卽令其進攻巢縣和含等處著袁甲三先期整頓軍馬一俟巢縣攻拔卽與楚軍聯絡聲勢會同多隆阿進取廬

剿以期迅拔堅城肅清皖北天長六合兩城本係李世忠招撫所有降眾自應仍歸李世忠統帶著袁甲三迅飭該提督將天六降眾盡行移駐於江浦浦口力籌進剿九洑洲賊匪並一面迅速知照都興阿俾都興阿得以就近分兵駐守天六兩城以壯聲勢而專責成將此由六百里諭令知之○諭都興阿奏派撥水陸官軍分投援剿獲勝並遵籌辦理情形一摺天六等處克復揚防情形較鬆該將軍擬令總兵詹啟綸帶領全部前往六合扼守另撥數營駐紮天長卽飭令詹啟綸等前往扼紮妥爲辦理九洑洲爲進攻金陵要區逆賊必負隅固守恐攻克旣不易得手而扼守尤無此兵力見據曾國藩奏稱都興阿一軍應俟扼守揚州而後可以進取所籌頗中窾要該將軍兵力不厚若急於貪功圖剿金陵而根本未固設育意外之虞殊屬非計務當與曾國藩妥爲籌商俟

和合克復後楚軍有進取之機該將軍卽合力進剿見在惟當相機嚴防令營中將士養精蓄銳以圖大舉將此由六百里諭令知之○戊辰諭議政王軍機大臣等本日據吳棠奏擒匪回撲清江官軍併擊獲勝一招擒匪盤踞眾興直撲清江北圩其西壩匪眾乘隙直渡鹽河兜合勢甚兇悍幸德楞額帶領馬隊擊退該逆仍在眾興盤踞另匪乘閒竄至安東恐其乘清江圩工甫修之時仍圖聚黨回撲著吳棠商同德楞額會合各軍力圖會剿並撥兵馳往安東縣城嚴密防守毋稍疏虞吳棠奏接田在田來函有帶隊二千名於初五日馳抵宿遷之語見在清江兵力不敷待援孔亟著僧格林沁卽飭田在田趕帶馬隊由桃源南岸東下併力會剿另片奏查鈔金安清泰州如皋寓所及錢鋪寄頓貲財該革員局用內有濫支銀一萬四千八百十二兩零此項濫支之款皆出自

江北錢糧捐釐正項應行賠歸江北糧臺著准其提往清淮接濟
軍餉金安清經手收支各款仍著飭催喬松年王朝綸等認真詳
察毋涉含混其上海寄頓貲財並飭委員迅速呈報將此由六百
里各諭令知之○駱秉章奏石逆由利川山僻小徑急趨四川石
砭廳見已竄鄧都縣下游之羊肚溪地方搶船渡河查川省兵勇
皆由分剿滇匪勢難抽撥而劉嶽昭易佩紳之軍又爲鄰省畱防
不能先期而至以固蜀疆見在俱落賊後以致該逆乘間闖入勢
將糾合涪州一帶滇匪進窺重慶臣帶來楚勇合之在川之湘果
營統計僅萬餘人以之會合本省兵勇專剿滇匪尙可漸次肅清
今以石逆大股犯蜀實有賊眾兵單之虞雖見已飛飭副將唐友
耕率所部由青神水路駛赴重慶並飭果毅營留傳理嚮導營張
由庚兩軍合剿鶴游坪滇匪以防勾結爲患人調已革知府唐炯

帶黔勇馳赴和州相機策應仍慮不足以遏賊鋒適接貴州提

田興恕來咨並致

臣

函因屢挂彈章皆蒙

聖恩寬大委曲成全

該提

臣

深知愧悔力圖報效茲聞石逆擾近川界願親帶勁兵三

千來川助剿並願歸

臣

節制伏維黔省苗教各匪勢已削弱見署

撫

臣

韓超熟悉黔省情形辦理可期有效而田興恕既於地方不

甚相宜前在湖南帶勇又甚得力見值蜀事孔棘不得不先其所

急除由

臣

徑咨田興恕速帶所部楚勇三千人由綦江取道馳赴

重慶仰懇

天恩飭下該提

臣

星速來川合力勦辦俾得早殄逆

氛

上諭

田興恕屢被彈劾因其立有戰功未忍遽加譴責茲因

石逆窺川亟圖帶兵自效並願歸駱秉章節制足見謙抑爲懷勇

於改過洵堪嘉尙此時石逆已於羊肚溪搶船渡河設由涪州關

入重慶勢將不可收拾卽著該提督統帶所部楚勇三千人剋日

起程由綦江取道馳赴重慶相機進剿早靖逆氛一切進止機宜
卽歸駱秉章節制所有欽差大臣關防著於到川後卽行交駱秉
章封存候旨黔省苗教各匪漸就削弱韓超夙諳軍務所有防剿
事宜卽著該撫妥爲辦理田興恕起程後貴州提督應否派員接
署並著韓超咨商駱秉章辦理將此由六百里諭令知之○飭山
西陝西撥解李世忠軍餉○己巳諭內閣薛煥奏浦東逆匪逼近
上海會同英法兩國剿除高橋賊壘大獲全勝一摺逆匪自經官
軍擊敗後退距天馬山後及陳防橋等處正月初八初十等日參
將李恆嵩乘勝攻破天馬山後及陳防橋等處賊營敗匪退入青
浦城中其浦東大股盤踞高橋意欲斷我吳淞要隘美國人華爾
約同英國水師提督何伯法國水師提督卜羅德各帶中外槍礮
隊伍並礮船輪船排泊浦濱華爾率隊登岸首先衝入賊巢以洋

槍連環轟擊副總領美國人白齊文裹創力戰英法二國隊伍各開槍礮攻擊華爾冒煙直進立將賊營攻破殺賊一千五百餘名其鎮北一村亦同攻入鎮東大壘屯賊窮蹙奔逃華爾會同英法將士追殺三十餘里立將該鎮賊壘全行掃蕩英法兩國前在上海幫同剿賊已獲勝仗此次復與美國人華爾約同助剿大挫賊鋒足見友邦誼篤始終不渝嗣後續有協助出力之處仍著薛煥隨時馳奏以彰中外和好之意○諭據薛煥奏美國人華爾營內副總領白齊文前經隨同攻剿天馬山等處衝鋒陷陣此次官軍進攻高橋白齊文首先衝入賊壘被賊砍傷右臂猶復裹創力戰實屬異常出力該副總領並在蘇松太道衙門稟明願爲中土編氓宣力戎行足徵忱悃白齊文著賞給四品頂帶花翎與華爾一併在松江教習兵勇協同官軍剿賊並由薛煥傳旨嘉獎○諭議

政王軍機大臣等鄭元善奏汝防喫緊新蔡被圍請畱楊飛熊一軍會同剿辦一招汝甯逆捻陳大禧負固平輿近復勾結沈項阜陽捻股張淵林匪眾圍撲官軍前敵營盤又據稟報逆捻楊方衡袁安愚等勾結髮逆及各路匪徒圍攻新蔡縣城四面紮營輪流攻撲情形甚爲喫重省防兵力不多未能分撥援救僧格林沁由通許一帶追剿竄逆見已駐軍尉氏本日據鄭元善奏已挑勇丁三千名前赴該大臣軍營聽調如里四黃河等民寨攻克後即可分兵助剿汝甯之匪楊飛熊一軍前諭令酌量飭赴槐店策應援顏見在新蔡被圍甚急勝保鄭元善毛昶熙自應飭令該副將仍駐汝郡酌撥隊伍先解新蔡之圍再會同張曜等軍攻剿平輿賊壘以期根株盡拔勝保見由陳郡進兵太和所有沈項槐店一帶毗連潁州深恐匪眾旁竄仍著勝保撥兵駐守毋稍疏虞將此由

六百里各諭令知之○諭勝保奏馳抵太和進援潁郡聞苗練欲圖殺賊自效一摺勝保督軍至太和後阜太之間反正來歸者已有二百餘圩並勦平王圩安撫田圩前敵各軍距潁城僅三十餘里辦理極爲得手惟潁州糧米火藥僅能支持旬日自應速籌援救著督飭將士星馳前進奮力攻勦速解城圍仍嚴扼西北兩路不得任令該匪竄擾他處李續宜派援潁之成大吉蕭慶衍兩軍係於正月二十六日由霍山起程繞道固始並著催提前進聯絡聲勢南北夾擊李續宜計亦不日可到可與之會商定計早殄逆氛苗沛霖聞勝保南下有約會圩眾先擣潁上進援潁郡之說如該練果能將張落刑一股剋日殲擒則殺賊既有明效自可許以白新儻第以立功自贖等語冀緩我師於張落刑等貌爲仇讎暗相勾結則狡謀深算豈得不防勝保惟當遵照前旨悉心籌畫剪

此巨憝不得因該練飾詞文過遽爲乞恩圖目前之苟安貽無窮
之後患諒該大臣必能體察情形妥爲辦理也將此由六百里諭
令知之○諭據薛煥奏稱洋人助順剿賊請將出力之美國人白
齊文鼓勵並調派水師嚴扼福山等處各等語賊匪盤踞高橋鎮
經英法水師會同常勝軍攻剿獲勝美國人白齊文衝鋒陷陣最
爲出力既據稟稱願爲中土編氓自應從優獎勵除英法兩國及
華爾出力之處另行明降諭旨外茲將賞給該洋人四品頂帶花
翎諭旨一道發交薛煥將此旨及前發去華爾獎勵諭旨一併在
滬宣示洋人助剿固屬得手亦難久資其力值此聲威較振賊膽
漸寒卽著薛煥督飭官軍實力攻剿其福山等處江面並著嚴飭
鞠耀乾等會同英國水師巡哨無稍疏忽至以後薛煥具奏外國
助剿情形務須據實直陳不可有一字虛假洋槍隊如能得力卽

著多挑丁壯交華爾等教演庶兵旣精而力不薄可當大敵將此

由六百里諭令知之○定各省旌卹章程○以李銘皖護理江蘇

按察使

由松江府知府護理

○庚午左宗棠奏杭城之陷失事各文武多由

海道奔赴上海縱令繞道馳赴

臣

軍多係應行查辦之員不敢朦

混收錄將來克復城池卽需委員經理而

臣

軍差遣乏人見在檄

調各員又難剋期趕到計惟有將

臣

軍尤爲出力應保各文員先

行甄敘相應開列仰懇

皇上天恩給予獎敘俾

臣

得收指臂之

助於浙省吏治軍政必有裨益 上諭內閣浙省杭城失陷後失

事文武均係應行查辦之員其將來經理地方及軍營差遣在在

乏員自應如左宗棠所請將隨營出力各員先行獎敘畱於該地

方以資得力知州劉典著以知府畱於浙江補用並賞加道銜知

縣楊昌濬著以同知畱於浙江補用主簿楊鼎勳著以知縣畱於

浙江補用並賞加同知銜知縣劉璈著以同知畱於浙江補用並
賞戴花翎卽選府經歷縣丞陶鴻勳著以知縣畱於浙江補用並
賞加同知銜廩生鄭錫淦著以知縣畱於浙江補用並賞戴藍翎
知縣李耀南著以同知畱於浙江補用縣丞李壽榮著以知縣畱
於浙江補用文童朱鈺著以縣丞畱於浙江補用卽選知縣劉盛
治著畱於浙江以知縣卽補俟補缺後以同知升用以示鼓勵○
左宗棠奏賊首楊輔青率大股賊眾回撲徽州均由嚴州府屬之
遂安逾嶺而入一蔓延徽屬之巖寺潛口等處楊逆率之以窺徽
郡一蔓延衢屬開化之張村中村等處賊目鍾明佳藍以導等率
之以窺婺源兩股人數眾多意在深入江皖腹地阻我援浙之師
以合圍衢郡臣於上年十二月間派候選直隸州知州劉典率各
營由廣信開道馳赴婺源旋據稟報鍾逆及各股匪盤踞張村等

十餘處將由濟嶺大鋪諸嶺犯婺臣以賊勢趨重婺源我軍並畱防婺源之兵僅止五千餘名不敷防剿婺源居安徽徽州江西廣信兩郡之中地勢在所必爭十九日親率畱駐廣信之親兵營老湘營前進行抵德興飭道員王開來率老湘七營赴德婺交界之白沙關臣自率親兵營五百餘人赴婺督剿時賊目鍾明佳已遣騎分犯大鋪嶺濟嶺二處婺源守嶺練丁紛紛告急劉典派隊下嶺擊卻之二十六日劉典率各營由江灣過大鋪嶺分路進剿候補同知直隸州知州朱明亮帶隊直抵張村賊壘賊倉猝迎拒嶺上瞭望之賊又四路包鈔而下朱明亮左右衝突正危急聞參將黃少春等率所部從右路石佛嶺馳下賊分途迎拒我軍整隊衝殺斃悍賊數百名忽曾村賊從後路鈔至劉典等率馬步各隊縱擊賊數路俱敗躡追至原山始收隊而還是役連破賊卡賊巢十

餘處斃賊一千數百名鍾逆敗後退至馬金街老巢是日徽防副將張運桂等會擊巖寺潛口之賊亦獲大捷賊巢一空餉道無梗楊輔青遂於二十九日竄去徽郡解嚴而婺源之防亦固本年正月十五日臣率七營由汪口逾大鏞嶺進劉典率五營由江灣逾濟嶺進先飭老湘七營由白沙關進駐篁岸兼扼開化華埠之衝十七日臣部前隊甫抵篁岸忽報逆眾數千由銀坑出張村曹門而至石佛嶺都司楊和貴等遇賊鏖戰王開來派軍繼進賊駭而奔官軍乘勝蹙之斬馘無數追至張村撤隊十八日臣率各營行抵張村劉典率各營至何村兩路相距三十餘里持數日糧約期分路進剿皆以七成隊出戰三成隊守營賊於馬金街高環等處踞險爲巢而於近巢山坳徧立卡棚層層密布守禦甚固二十日臣派隊由巖坑出口先攻高坪一路賊卡劉典率各營先攻高環

一路賊卡黃少春等由何村進抵高環該逆憑卡堵禦知縣陶鴻勳等從嶺後突出夾擊賊不知所措棄卡狂奔劉典等分兵循嶺包鈔而下遮賊去路縱橫痛擊適張村各營已攻破高平賊卡總兵崔大光等率所部分途追剿前來與何村各營合會立將馬金霞山原山徐塘口等處賊巢掃蕩一空兩路分途接剿共計斃悍賊五百餘名生擒二百餘名敗賊分竄遂安常山地界均棄械狂奔經各鄉民沿途截殺者亦不下千餘名據生擒賊供藍逆已於高環卡破時被官兵陣斬鍾逆聞高坪卡破已單騎先遁此外大小賊目殲斃不少見在衢州府屬開化縣境一律肅清臣飭老湘營進駐開化縣城親率各營進駐馬金街探報遂安縣城尙有賊踞臣當確探賊蹤相機援剿務保完善之區 上諭議政王軍機大臣等左宗棠奏督軍入浙截剿巨股賊匪疊勝衢屬開化肅清

並請飭派辦糧臺獎敘隨征出力飭調赴浙差委各員等摺片左
宗棠之軍入浙所辦尙爲得手見在開化肅清衢郡後路可期穩
固該撫率兵進駐金馬街相機進剿遂安之賊婺源旣已無警饒
廣兩郡亦相芘以安江皖邊境不須回顧該撫胸有成竹定能步
步爲營一意進取務當隨時與曾國藩通籌大局毋失事機將此
由六百里諭令知之○諭前因杭城失陷疊經諭令左宗棠將杭
城文武下落及總兵沈文榜等潰退情形並林福祥饒廷選蹤迹
一併查明具奏茲據林福祥奏稱該員先由金華回援杭城駐紮
江口自帶親兵五百人入城守禦因賊太眾糧盡援絕撫臣知事
不可爲密札林福祥與麟趾以城池不守卽當設法出城收集潰
兵力圖恢復另用白綾小字繕就摺片稿二分鈐蓋關防交林福
祥麟趾二人分收豫備出城後附奏報呈覽城陷後林福祥與麟

趾各率所部巷戰與麟趾中道相失林福祥偕織造恆起各率兵
勇由武林門衝殺而出另片奏擬由桐鄉之田市鎮沿江赴曾國
藩左宗棠軍營乞假偏師圖復杭州以洩仇憤各等語並據恆起
奏稱杭城失陷時與林福祥帶兵衝殺同入滿營滿營陷後相偕
衝殺出城與林福祥所奏情節大略相同林福祥以藩司大員當
省城失陷時不能與將軍巡撫等同時殉難例有應得之罪其所
稱奉有巡撫將軍等帛書屬令忍死須臾潛圖恢復等情是否實
有其事著左宗棠確切查明據實具奏署藩司麟趾聞其平日居
官尙好林福祥摺稱與之中道失散其是否出城及有無下落著
一併查明具奏恆起雖無守土之責亦係欽派之員摺內所稱衝
殺出城各節及自請從重治罪之處並著左宗棠查辦恆起摺一
件林福祥摺一件片二件及瑞昌等帛書摺片稿均著發交左宗

榮閱看學政張錫庚副都統傑純據林福祥奏稱殉難是否屬實
總兵繼興前經慶端奏請賜卹茲據林福祥奏該總兵與副都統
關福由錢塘門衝出等語副都統關福總兵繼興已革總兵米興
朝參將張虎臣王興棠遊擊林連高都司劉加玉饒廷杰李超羣
知州汪廷樞均著左宗棠薛煥查明嚴行參奏其乘舟赴滬之總
兵況文榜吳再升副將貴廷芳陳步高及一切將弁均著薛煥就
近傳旨拏問解赴左宗棠軍營與羅大春一併訊明按照軍法從
事將此由六百里各諭令知之○允左宗棠奏於江西廣信府設
立糧臺○予浙江陣亡訓導陳修等祭葬世職○壬申諭議政王
軍機大臣等袁甲三奏南岸賊匪竄渡江浦浦口等處請飭曾國
藩都興阿抽調師船嚴防竄渡等語江浦浦口等城爲江北緊要
門戶見在南岸大股賊匪由九洑洲等處竄渡北岸勢將以全力

併注兩城與官軍力爭隘口該兩城南經收復兵力本不甚厚設南岸賊匪再行陸續渡江防剿更形棘手亟應將上下游師船移調該處以防竄渡著曾國藩督同彭玉麟於上游楚師礮船內抽撥二百隻由梁山至烏江江面停泊並著都興阿督同黃彬於下游礮船內抽撥一百隻由九洑洲至烏江江面停泊聯絡聲勢遇有賊船卽立行截擊俾該逆無從駛渡北岸是爲至要江浦浦口兩城關繫江北全局烏江水面路通和州巢縣爲廬郡賊匪水路出入門戶見在廬郡圍攻喫緊尤宜嚴密防範諒曾國藩等必能統籌兼顧不至遷延貽誤也將此由六百里加緊各諭令知之○袁甲三奏臣前約楚軍進攻廬郡旋接多隆阿函稱已派總兵雷正綰石清吉統帶精選飛虎等十四營卽日進趨廬郡臣當派副將徐鵬等前往整頓各練於曹家古堆橫店等處紮營以遏北竄

旋探楚軍已至廬城南門西門外查看情形該逆負嵎死守並未
出拒楚軍步步爲營見已至二十里鋪臣續接多隆阿函稱布置
已漸周密擬卽派隊攻城但城大而堅恐未能速下等語臣又委
副將朱淮森押解軍火前往會商徐鵬等進至城北十三里古堆
十八里岡七里河等處相地安營令駐防定遠之總兵吳秀調撥
參將張景春一軍再由臨淮抽撥大隊派總兵張得勝統帶前往
聯絡楚軍會合夾攻西路潁郡尙未解圍勝保計日可到自必亟
圖援剿臣前次函商李續宜酌派駐六之總兵吉順援潁一節嗣
接吉順來稟已調兵七百餘人赴潁該鎮因病畱六未能前往李
續宜約於正月底自鄂啟行由安慶前赴六安紮定老營再圖進
剿見已先飭總兵蕭慶衍成大吉道員葉兆蘭於前月二十六等
日分起星馳援潁由固始取道前進計日當已趕到 上諭袁甲

三奏楚師進逼廬郡派兵會攻並江浦等城喫緊並據李世忠密稟洪逆給與僞詔各等語髮逆負隅廬郡楚師業已進抵西南兩門袁甲三調派總兵吳秀等統兵往會著卽督飭該總兵等相機前進會合夾擊藉得迅掃逆氛至江浦浦口兩城地關緊要見在九洲及和州賊匪分投來撲李世忠業派升用總兵李顯爵等將周撲橋林等匪擊退仍著激勵將士實力防剿無稍疏懈李世忠矢志忠勤爲朝野所共信逆賊投以僞詔語句悖逆該提督懇請袁甲三代爲奏明尤見惻怛摯實堪嘉尙見在江北漸就肅清卽當進擣金陵揜渠埽穴該提督戮力行間正可渥邀懋賞也將此由六百里諭令知之○停福建本年例貢果品○癸酉諭議政王軍機大臣等官文奏籌辦湖北軍務大概情形一摺據稱江浙蘇杭賊勢猖獗皖豫四川逆氛環逼湖北界連數省處處防剿

不追曾國荃新募之十二營業已到鄂以江面東西梁山賊卡重
盛陸路無可繞越驟難進取見在擬俟廬州克復後畱一軍夾擊
捻匪畱李續宜一軍駐守安慶以固皖省根本再畱一軍駐守淮
陽會合水師遏截江面分一軍由鎮江進攻蘇常分一軍由蕪湖
急圍金陵分一軍攻甯國而趨湖州直規杭城分一軍由常玉二
縣入衢州而恢復甯紹約期齊舉使賊首尾不能相顧一路得手
則他路可迎刃而解等語所陳於規畫東南大局極合機宜惟兵
貴神速軍情旦夕變遷過於迂緩恐落後著所有進取布置機宜
著官文曾國藩統籌全局會商定議迅速辦理楚師已抵廬州著
卽飭多隆阿等會合袁甲三兵練迅速進攻力拔堅城其曾國荃
一軍卽飭進圖巢縣和含梁山以與江北江浦等軍會合毋稍遲
誤湖北爲下游大營後路官文仍當督飭各軍慎密守禦俾東征

無虞返顧其上游川黔各匪並著飭令南北兩省兵勇擇要扼防以維大局另片奏川楚江皖五省勢難合力同謀等語侍郎宋晉所陳五省合剿事宜節據駱秉章毛鴻賓覆奏事屬難行惟將來大舉東下亦不能不借資各省所有東征兵數餉數卽著官文咨商曾國藩籌議辦理將此由六百里各諭令知之○勝保奏臣於二月初七日飭總兵成祿等馬步各軍由兩河口進紮距潁州三十五里之劉家集節節滾營前進直逼賊巢初八日賊騎數千蠶擁前來意欲撲我新築營盤臣派道員洪貞謙督飭前敵各軍奮力迎剿馬賊登時敗退我軍分路齊進行至數里見大股賊匪列仗數層眾逾數萬我軍列陣轟擊斃賊數百名該逆恃眾來撲經協領常海等帶領吉林黑龍江馬隊分路鈔擊步隊繼進鏖戰三時之久賊勢不支紛紛敗退我軍追壓十餘里斃賊千餘名進至

小王寨劉家海迤北見該處賊眾屯聚尤多層層接應未便深入
撤隊回營初九日我軍分爲三路轉戰而前先將小王寨攻拔斃
賊甚多餘眾併入劉家海賊巢乘勝進攻沿途搜捕伏賊數百名
各軍馳抵劉家海賊眾一二萬仍圖列隊抗拒我軍屢捷之餘益
加奮勇交戰數刻賊盡披靡乘勢掩殺血流成渠遂將劉家海十
餘處賊營全行攻破餘眾向西南一帶遁逃我軍追至距潁十里
之王家圩寨安營查圍潁之賊股數眾多非節節攻拔勢難直抵
城下且東路捻勢過重尤非一面兵力所能解圍臣於未抵太和
之先卽密調苗練各營令其及早圖功會合攻勦潁東賊氛旋據
各圩稟報苗沛霖聞臣親至齊集東練數萬由下蔡進薄潁上出
其不意攻破張落刑老巢節節勦殺於初九日馳抵距潁三十餘
里之迴瀾集定於初十日齊到潁州潁東一帶賊營數十座全行

攻破並擒斬大小擒首五十餘人賊勢大潰臣見已一面飭令前敵探明沿河賊壘尚有若干竭力進攻以期早抵城下一面先行密通潁郡消息俾知大軍已到庶可內外夾擊迅解城圍見聞楚軍已抵潁南七十餘里之大橋集日內當可趕到臣見將太和後路布置妥協卽行前進親督各軍痛殲醜類力挽全局上諭本日據鄭元善遞到賈臻奏請催援兵及接仗獲勝各摺片並據勝保奏攻拔潁北賊壘並密飭苗練會合進兵一摺據該署撫稱被圍日久糧米無多鉛丸早盡請飭催勝保所派之總兵成大吉等速行赴援等語情形實屬危急惟據勝保奏前敵官軍於初九日攻克小王寨劉家海賊巢直抵距潁十里之王家圩寨安營該城危在呼吸成祿等既相距僅止十里卽著勝保嚴催該總兵等迅速進攻立解城圍毋稍延緩勝保奏苗沛霖率練數萬攻破張落

刑老巢已抵距潁三十里之迴湓集並有初十日齊到潁州之信等語潁州東路擒匪既經苗練剿擊獲勝此時籌解潁圍正須兵力勝保自應與該練聯絡聲勢藉壯軍威惟潁上巢穴雖據探稱攻破而張落刑尙無下落該練遽已前進豈不虞該擒首糾合餘黨起乘其後是苗沛霖總須將張落刑擒斬方可自明心迹該練居心叵測值此率領大眾突如其來勝保務遵疊次諭旨慎之又慎不得稍涉率易貽誤大局成大吉等軍已抵潁南之大橋集並著勝保就近催提會合攻擊李續宜諒已行抵安慶著卽星馳前進將潁郡一帶軍務力籌整頓卽可將辦理苗練事宜與勝保會商妥辦將此由六百里各諭令知之○甲戌諭內閣毛昶熙奏擊退竄捻克復賊圩一招擒匪竄擾河南經僧格林沁於杞縣擊剿獲勝後歸德平臺一帶續有股匪游駛經毛昶熙督飭陳祿興將

學耕馬步各軍合剿擒斬多名將大股賊匪壓退其孫之友一軍在永城一帶接剿直搗王花園賊圩殲斃長髮老捻數百名並先後收撫丁樓等處九寨辦理均爲得手著毛昶熙乘此聲威約會各路官兵迅速掃蕩毋畱餘孽○諭議政王軍機大臣等田興恕奏暫畱沈宏富一軍俟平定玉華山等處再行飭赴浙江等語前因浙江軍務緊急據左宗棠所請諭令田興恕遴選勇丁派總兵沈宏富管帶星速前往歸左宗棠調遣茲據田興恕奏沈宏富一軍勦辦玉華尙大坪兩山黃匪正當喫緊該二山逆匪譚光前何得盛等爲黔省腹心之患沈宏富等轉戰經年已將賊之羽翼剪除老巢圍困不出兩月定能得手此時若一更動又慮顧此失彼且亦無從調隊接替一俟二山蕩平卽當遵旨派沈宏富帶兵赴浙等語前因駱秉章奏石達開股匪竄逼川疆曾經諭令田興恕

督催副將朱淩漢等速卽赴援嗣據駱秉章又奏接田興恕咨函
願帶勁旅三千親往助剿並歸該督節制復經諭令田興恕卽率
所部剋日由綦江取道重慶進剿黔省苗教各匪防剿事宜田興
恕起程後著韓超妥爲辦理韓超接辦諒能迅圖廓清沈宏富剿
辦玉華尙大坪兩山黃匪未可驟離亦係實情著該撫督飭進剿
剋期蕩平卽遵前旨飭令該總兵帶領勇丁星速前赴左宗棠軍
營助剿毋稍延緩將此由六百里諭令知之○命惇親王充上書
房總讀達○乙亥 母后皇太后 聖母皇太后懿旨添派惠親
王之子奕詢在弘德殿伴讀○諭議政王軍機大臣等僧格林沁
奏續行進剿西竄毫捻疊獲勝仗一摺前經疊次諭令該大臣熟
籌進剿毫捻老巢以爲先發制人一勞永逸之計原須全局統籌
謀操必勝方可大舉茲據僧格林沁奏稱此次毫東各股捻逆西

竄經我軍馬隊及豫省勇隊屢次殲除其餘匪零星逃回者不及十分之一但著名捻首未能悉殲更兼清淮一路尙有李成大股竄擾潁上又爲張落刑糾約各股勢甚鴟張一時難以肅清軍行糧餉爲先卽如此次進剿西竄捻股雖經各地方豫備糧草有五言十豈能士飽馬騰每值撤隊尙須竭力經營何能驟行深入更兼各處協餉積欠過多屢經催解罔應是以徒有犁庭掃穴之心而無籌畫餉精之計等語洵屬實在情形毫東老巢巨捻結眾西竄屢經痛剿遁回零星敗匪所餘無幾乘此鼓行而前捻渠擣穴淨絕根株實有可圖之機乃以儲峙不先糗芻弗給未能乘勢急切蒞事皆由地方官吏疲玩成風一時積習難以驟挽殊堪痛恨本日業經嚴切寄諭鄭元善吳棠及直隸總督山東巡撫竭力通籌豫備糧草以爲進剿老巢之策並飭將各省應解協餉剋期撥

解該大臣軍營俾得士飽馬騰方可定期大舉僧格林沁忠勇素著謀略兼長此次西竄捻匪疊被勦創實足以寒賊膽惟寇窮則有反噬之心捻匪所畏者僅有該大臣之軍恐其聲彼擊此別蓄詭謀該大臣總當於勇往之中寓慎重之意遇有緊急酌量調遣縱將來遠涉窮追直搗巢穴止可撥兵前去亦斷不必身臨前敵本日聞在田尚有稟該大臣抽撥馬隊之請可見清淮徐宿一帶捻氛尚熾專恃該大臣坐鎮是指揮調度較衝鋒陷陣爲尤要也至直隸山東河南及江北各路應解協餉該大臣卽隨時嚴催毋任延緩如再仍前玩愒卽行據實嚴參一俟餉稍豫備可以足用定期密約各路直搗毫巢再行妥籌馳奏諒能謀定後動相時緩急毋誤事機也該大臣何日回至單縣仍卽先行具奏以慰廑念將此由六百里諭令知之○諭僧格林沁奏追剿西竄捻逆殲除

殆盡一摺據稱毫東各股捻逆西竄經官軍疊次殲除得以逃回者不及十分之一惟行軍之要糧草爲先各處協餉積欠過多徒有直擣老巢之心實無籌畫糧草餉糈之力等語僧格林沁已抵商邱之牧馬集正可撥兵或親自督隊一鼓作氣乘勝進攻附近蒙亳一帶捻圩剋期滅賊惟東由宿州西自亳州兩路進剿該處賊圩林立大兵進擣無從覓食必得寬爲豫備方不至軍行遲誤况進擣老巢實爲東豫等省永除後患該大臣衝鋒冒險勞勩如此而該督撫於應解餉項尙不熟悉心籌畫於心何安著文煜鄭元善譚廷襄於欠解月餉無論何款卽先行撥解僧格林沁軍營吳棠於徐州江北兩糧臺一併悉心籌畫源源解往俾得士飽馬騰剋期進擣老巢無後路之虞方爲妥善儻仍前延誤致僧格林沁停兵待餉必治文煜等之罪懷之將此由六百里各諭令知之○

丙子諭內閣前據沈兆霖奏查明撤回滋事大員不能實力勦辦捏稱投誠奏結當將力主撫議之提督成瑞並始終回護之西甯辦事大臣多慧先行革職交刑部分別定罪茲據刑部定擬罪名具奏已革西甯辦事大臣多慧接辦軍務後於撤匪抗不就撫情形隱匿不奏輒以疊次勦辦該匪悔罪投誠等詞捏報邀功以致凱撤後地方被擾較前更甚迨沈兆霖馳抵甘肅後提傳匪首馬尕三赴省質訊多慧復爲咨商請緩並以該匪續行出掠爲提訊馬尕三起釁根由藉詞挾制已革甘肅提督成瑞督兵勦匪首冊撫議於參將希朗阿與撤匪接仗遣弁請援時相距甚近不爲救應復因遊擊閔相儒在扎什巴堡被困輒向馬尕三說合並誤信該匪詭詞致南川一帶復被焚搶守備陳治猷等同時被害均屬縱匪殃民失誤軍律多慧尤屬始終回護多慧成瑞均著照部議

斬監候秋後處決該革員等所犯情節較重雖在上年十月初九日恩詔以前均不准援免並著沈兆霖派員將多慧成瑞押解送部監禁歸入朝審辦理○申禁軍機章京等私通信息○命崇厚成明督辦天津海防○丁丑諭內閣大學士銜禮部尙書祁雋藻呈進摘錄經史二帙條分縷晰切要簡明著將此書陳設弘德殿以資講肄○諭薛煥奏洙涇防兵潰散請將帶兵之提督降補等語署江南提督福建陸路提督曾秉忠帶兵駐防洙涇當逆匪分股來撲失去礮船水陸各軍紛紛潰退以致逆匪闖入該署提督所部兵勇於上年曾經搶劫英國絲船此次督防洙涇復不能力遏賊氛失去要隘實屬不知振作貽誤事機僅以副將參將降補不足蔽辜曾秉忠著卽行革職發往曾國藩軍營差遣委用以觀後效○諭議政王軍機大臣等勝保奏督軍援潁深入重地面面

受敵並大營後路被賊攻陷請飭各路派兵援救各摺片勝保一軍自連破劉家海等處賊壘進抵距潁十里之王家圩安營與城內消息已通乃粵捻各逆知該大臣孤軍深入復悉眾來撲並糾合西南各悍賊分包前敵營盤又分股竄陷穗子鋪地方該處爲大營後路要道我軍後路已斷面面受敵兵力不敷分撥糧餉軍火缺乏情形萬分危急著僧格林沁迅撥得力馬隊千餘名馳赴槐店歸勝保調遣並著鄭元善督帶省防勁旅暫行進紮陳州以固大營後路而爲前敵策應總兵成大吉等一軍距潁不遠著李續宜卽飭該總兵等兼程前進與大軍會合力解重圍僧格林沁等向來皆以國事爲重斷不可有意見不和之處稍緩須臾致誤全局副將楊飛熊一軍前經鄭元善奏請畱駐汝郡會合張曜等軍攻剿平輿賊匪目下勝保待援迫切著鄭元善斟酌情形如汝

甯防務稍鬆卽飭張曜獨力勦辦仍飛飭楊飛熊一軍星速馳援
潁郡毋得稍分畛域致誤事機勝保所參總兵成祿赴援遲延副
將劉景芳築營未定爲賊所乘均屬顛預疏懈成祿著摘去頂帶
劉景芳著暫行革職均准其畱營勦賊以觀後效儻再不知奮勉
卽行從嚴治罪本日復據副都統明慶馳奏安插降眾仍帶隊赴
豫助勦請飭周士鍵來營帶隊等語明慶並非幫辦大員以安插
降眾事宜並不稟請該大臣陳奏輒自行入告已屬非是周士鍵
聲名惡劣勝保前此擅畱差委尙未允准明慶何得率行奏請畱
營尤屬冒昧該副都統前次出京沿途需索供應從寬未予嚴譴
此次種種謬妄著勝保卽飭回營並傳旨嚴行申飭御史薛春黎
奏被賊裹脅良民請仿照龔景瀚遺法設法解散一摺著僧格林
沁勝保酌量辦理原摺著鈔給閱看將此由六百里加緊各諭令

知之○諭前因購買洋船須配兵勇諭令曾國藩先行籌備茲據
曾國藩奏楚軍水勇僅能用之江面未能強令出洋等語見籌購
買外國船礮本擬用於江面剿賊並非施之海洋惟楚軍由江北
赴滬陸路多梗故有由海道前往之諭至外國船隻尙稱堅緻而
英法駐京公使則稱凡上海等處洋商所售船隻均不可恃必須
於伊等本國及香港購覓方可利用此時伊等已函致各該國帶
兵員弁幫同物色等語購船一事諒可卽有頭緒所有應配兵勇
仍著曾國藩先事豫籌其如何赴滬臨時再行酌辦上海被匪窺
伺勢不能不借洋人之力協同守禦曾國藩亦曾奏及至規復蘇
浙失陷地方自應別籌良策前據薛煥奏稱江浙紳士殷兆鏞等
呈請借助西兵規復蘇常各屬城池當以該紳士等情殷桑梓或
非無見諭令薛煥酌度情形辦理茲據恭親王等奏稱江蘇紳士

潘曾瑋帶同浙人龔橙復由滬航海來京訴稱鄉閭被陷懇請借用英法等國官兵速籌規復已諭令總理衙門向各該國駐京公使籌商惟上海爲洋人通商之地借助尙屬有辭若攻剿內地賊匪輒欲用外國兵力軍行餉隨一切供應之煩亦恐萬難措拄該紳士等情詞懇切固難重拂輿情此事是否可行卽著曾國藩悉心籌酌迅速馳奏美國人華爾白齊文向於上海教習洋槍隊伍疊據薛煥奏稱隨同參將李恆嵩剿賊出力均經降旨獎勵給與四品頂帶花翎並准其改用天朝服色惟聞該洋人等於奉到諭旨後並不改換服色亦未帶用翎頂詰以何故則稱李恆嵩並未剿賊薛煥鋪張入奏以故心懷不服似此疆圉危急之秋薛煥尙不思考覈功過明定賞罰以勵士氣輒欲見好屬員豈復知事勢緩急前因該撫萬不足恃曾諭曾國藩催令李鴻章前赴鎮江署

理撫篆並因曾國荃須畱皖北諭令於陳士杰到安慶後卽令赴滬此時陳士杰如已到皖著卽催令前往上海如尙未到並著曾國藩於見在安慶人員內揀派帶兵得力大員速行赴滬將該處兵勇力籌整頓其滋事勇丁並著設法懲辦毋令勾通賊匪爲患前因湖州危急諭令道員趙景賢卽行赴任本日據薛煥奏自正月初二日賊匪奪踞大錢口後音信難通探聞賊眾二十餘萬將城圍住前奉飭令赴任諭旨無從齎入解往之米糧軍火亦中途折回等語趙景賢保守湖州幾及一年實屬才略出眾人才旣應愛惜地方尤關緊要斷無因賊氛甚熾無路赴援任令坐斃之理統計各路軍營惟鮑超去湖州較近前據曾國藩奏稱該提督尙在青陽卽著該大臣飭令速攻甯國取道廣德進援湖州最爲要著如果鮑超兵頓堅城猝難攻入仍須咨商左宗棠另行設法援

應湖郡毋稍延緩將此由六百里加緊諭令知之○諭薛煥奏常勝軍會同英法兩國剿除蕭塘賊壘逆犯泗涇等處見飭各軍回防洙涇各營潰散請將曾秉忠降補等摺片覽奏均悉中國借外國兵力原屬一時權宜之計必須能自振作方可使之同心協力助我兵威若專恃外國之助而我兵觀望不前尙復成何事體風聞參將李恆嵩近頗畏蕙並有冒功情事薛煥何以未經參奏如實有此等事亦足爲外國人所恥笑此時藉外國兵力爲援必須賞罰嚴明方足以示大公而昭激勸上海一隅有兵數萬如果一兵得一兵之用較之他處軍營尙易爲力薛煥當須就見有兵力痛加整頓務使餉不虛糜兵歸實用文武如有不職者卽須嚴行參劾豈可瞻徇情面狃於積習嗣後不能不借資英法之力亦須派隊協剿不可坐視成敗致外國嘖有煩言洋槍隊旣爲賊所畏

卽多派壯丁勤加練習華爾等奮勇可嘉亦須保全護惜俾收指臂之助見在該逆分犯泗涇七寶月浦野雞墩等處薛煥務當督飭在防將弁實力勦辦無稍鬆勁另片奏趙景賢力守湖州請催鮑超應援等語已諭曾國藩催令該提督星速救應該撫仍當籌措軍火糧餉設法轉解以保危城將此由六百里諭令知之○諭袁甲三奏奪回梁園要隘平毀香積寺等處賊圩擬與楚軍會逼廬城並西路布置情形一摺梁園賊隘經都司褚開泰等會合民練攻克並將香積寺等處賊圩四座蹋毀袁甲三並派總兵張得勝等督同兵練滾營前進擬俟營盤紮定後卽赴楚軍籌商進攻廬郡機宜此時楚軍已由南路進逼廬郡距城十里正可乘此聲威會合進攻克復城池該郡城大而堅逆首陳玉城積猾善守難於力取惟有四面合圍斷其糧路逆眾可不戰自潰著曾國藩袁

甲三飭令在營將士迅將店埠等處賊營攻拔以斷廬逆聲援昨據官文奏曾國荃新募楚勇十二營由鄂省籌撥餉需催令下駛此時計已行抵安慶著曾國藩迅飭該藩司規復巢縣並和含各處城池以斷廬匪歸路至廬城西面有無賊營未據袁甲三奏及如須添兵圍攻卽著曾國藩袁甲三會籌續派兵勇前往會剿爲四面合圍之計毋令該逆乘隙他竄又復蔓延至苗練欲赴蒙城尋仇因官兵進城將營盤十餘座旋行撤退該練存心叵測道路皆知如果誠心就撫何以尙令大隊黨與前赴蒙城尋仇前已諭知勝保於苗練就撫一節慎之又慎不可率易著袁甲三督飭文武先將鳳懷壽定一帶附苗各圩收撫以孤逆勢仍密行知會李續宜相機行事如苗練再有反覆情形卽著會同剿辦博崇武係黨附苗練之人所稟情形未可輕信仍著袁甲三另行確探斟酌

辦理另片奏土匪丁潮臣於小梁莊地方築營抗拒經官兵攻拔兩營所賸一營夤夜潛遁並攻拔王家集各圩等語見在各圩間風反正潯北已漸次肅清惟逆首丁潮臣尙伏李相臣圩內著袁甲三督飭在事各員速行攻拔務將首逆殲擒以除後患張學醇尹善廷慶瑞聲名均甚平常帶兵未必可靠並著袁甲三慎選將領以期得力本日據御史薛春黎奏被脅良民請設法解散一摺著曾國藩等斟酌辦理原摺著鈔給閱看將此由六百里各諭令知之○以宗室岳靈載泰襲封鄭親王怡親王所降輔國公爵○諭李續宜安集皖北流亡○己卯諭議政王軍機大臣等前因楊載福奏母病未痊舊疾復作懇請續假調理當經諭以水師分防池州等處江面水營雖有得力將領必得該提督躬親調度令其迅速起程茲據奏稱傷疾未痊請賞假三月在籍就醫等語楊載

福自在軍營疊受厚恩該提督素知大義值此和含攻剿喫緊之時正臣子力圖報效之秋即使傷疾復發亦不妨赴營調治藉資坐鎮豈可再行續假著曾國藩傳諭該提督朝廷方資倚畀卽當迅赴池州軍營會同彭玉麟等力籌堵剿斷不能再允給假俾該提督卽日起程會攻和含等處賊匪肅清江面並於到營後卽由曾國藩馳奏以慰廑念將此諭令知之○諭譚廷襄奏查辦折回降眾及剿撫河東水套內屯匪情形並遮克敦布等奏進剿南路捻匪獲勝查辦逃回降眾漸次就緒各摺片覽奏均悉降眾張玉懷等前經勝保帶赴豫省剿賊竟敢私自折回立予駢誅亦屬罪所應得惟據譚廷襄等查明該降眾折回係由渡河無船又乏口食所致尙非遽行反側到籍後投官稟訴懇乞歸農並據莘冠兩縣各鄉紳團出具保結代爲懇請見在該降眾等呈繳器械馬匹

業經分別散遣譚廷襄遮克敦布等所奏情形大略相同著卽照所議辦理其有情願隨征者仍著分起押送皖豫軍營其堅欲歸農者並須妥爲鈐制如有不安本分之徒持械打糧等事該撫等務當隨時掩捕毋稍寬縱至河套屯聚之匪疊經劉煦督率兵勇分路進剿將習城鎮等處賊巢全行焚毀其盤踞甘露集餘匪亦卽羅拜乞降匪首石鳳標等束身聽命旣據譚廷襄等查明該匪多係失業流民與甘心從逆者有閒亦著照所議分別安插貸其一死其郭申令等股是否一律投誠如水套內尙有餘匪藏匿仍著譚廷襄遮克敦布等痛加剿洗務絕根株毋許稍有粉飾將此由四百里各諭令知之○庚辰諭議政王軍機大臣等鄭元善奏竄豫捻匪被僧格林沁痛剿業已破膽正宜乘勝直擣蒙亳老巢惟孔海東寨雖已攻破而平輿未克勝保餉道被賊阻遏新蔡被

圍亦甚緊急見擬調楊飛熊赴援斬蔡該撫亦卽統兵出省取道
陳州項城相機籌辦等語捻匪竄擾豫省大受懲創亟宜乘此聲
威爲埽穴擒渠之計惟勝保孤軍深入勢將被困著僧格林沁遵
照前旨速撥馬隊千餘名星馳前往槐店聽候勝保調遣以資得
力鄭元善前赴陳州與前次寄諭適相符合應如何派撥勁旅馳
赴新站界首等處爲勝保後路聲援並著速籌辦理毋稍延緩致
有貽誤至新蔡被圍已閱四十餘日鄭元善見飭楊飛熊由汝甯
往援著卽飭令前進汝蔡解圍後應否飭令赴潁再由該撫酌度
情形調撥平輿賊匪著鄭元善嚴飭張曜速籌埽蕩其金樓踞匪
久經毛昶熙圍攻未下見經僧格林沁派隊往剿諒自無難攻克
一俟新蔡金樓得手後卽可籌攻蒙亳正在寄諭開據鄭元善馳
奏援潁官軍於穗子鋪失利等語圍攻潁州賊眾不下一二十萬

勝保孤軍深入而穗子鋪猝破攻陷危急情形實屬不堪設想鄭元善業已督同楊飛熊等赴陳尙恐兵力單薄於事無濟卽著偕格林沁察看情形或親統全起馬隊馳往陳州與鄭元善會商進剿或派妥員分帶馬隊前往應援之處均著相機妥辦該大臣未到以前仍著鄭元善督催楊飛熊等飛速前進務將穗子鋪先行攻復以通勝保餉道俟潁州情形稍鬆卽行馳援新蔡至陳郡迤東捻股旣據鄭元善探聞有侵擾周口窺伺省城之說並著該撫於到陳後相機防剿毋任深入將此由六百里加緊各諭令知之○諭據吳棠奏派隊逼退東竄捻股獲勝探聞另股捻首竄至高作地方竭力籌剿一招眾興捻股回撲清江經官軍扼擊獲勝後分股由沐境繞竄圖襲安城復繞至阜甯縣境均經兵練擊退其三義壩等處賊圩亦經官軍衝破逼賊西遁惟據稟報另股捻首

魏坤等聚眾二萬餘人由睢甯縣境竄至高作地方聲言接應眾興踞匪合股東竄見在北岸捻匪未能殲除又有另捻東趨清江各路防兵扼堵眾興踞匪萬難撤動吳棠已抽出副將劉成元一軍馳扼桃源縣西之成子河圩以防南岸另捻東擾之路而兵分力薄深恐不敷勦辦田在田帶隊已至高作著僧格林沁飭令迅將該處逆匪埽蕩卽由南岸進兵與劉成元會合夾擊毋令逆眾奔突紛擾是爲至要本日馮子材等奏江南糧臺駐紮高郵距鎮江較遠一切捐款向由各局解赴糧臺再行分撥展轉稽遲動需時日未免貽誤事機吳棠前次釐定南臺進款內鹽釐一項係在泰興所屬之口岸設局徵收該處距鎮止隔一江請飭就近徑解鎮江等語鎮江需餉孔亟所有鹽釐一項著吳棠轉行喬松年卽飭口岸局員就近徑解鎮江支放局以資湊發仍隨時報明糧臺

覈實收放其餘沿江卡局各項捐款仍著飭知臺員查照舊章先儘鎮營之用並解赴高郵分別撥濟將此由六百里各諭令知之

○官文多隆阿奏逆首陳玉城自去秋黃郡隨州疊被楚軍痛剿退竄皖北糾集黨眾盤踞廬郡修城濬濠抗拒我軍臣官文咨商多隆阿於本年正月十七十九等日飭令馬步各軍由舒城移紮進剿距城三四十里一帶步步爲營漸次逼城該逆於附城二十里內分踞四鄉不下四五萬人窺伺我軍營壘二十四日總兵雷正綰率所部移紮二十里鋪副都統溫德勒克西等各率馬隊進紮大蜀山二十五日總兵石清吉率所部移紮十八里岡該逆乘我軍修營未堅由西門得勝門出賊六七千人兩路前來我軍分路迎戰馬隊從後鈔截該逆退歸城壘各營且進且殺約斃老賊五六百名該逆於得勝門西門外修築石壘四處中設買賣街

並於城東大興集築卡四處長甯河中廟一帶亦築壘四處爲巢縣巢湖至廬城水陸運糧要路壘卡之外均濬寬濠二三道環列木城密布槍礮意在堅守不戰二月初一日雷正綰等進攻買賣街賊壘該處阻隔深河士卒鳧水直前焚其礮船貨船十餘隻城賊出援經我軍擊退卽時攻入壘內斃賊三百餘名將買賣街全行焚燒初二日夜間雷正綰復率隊馳抵大興集將四處賊卡焚燬擒斬賊匪四五百名維時天色漸明各營齊隊直下長甯河中廟賊首浦詳甫等不敢拒敵率眾乞降隨隊帶回初四日石清吉等各率所部分攻西門得勝門四壘拔毀木城填滿濠溝各營齊豎雲杙爭先登壘該逆拌死抗拒陳四眼狗見我軍攻壘緊急指揮賊眾四五萬人由東門南門西門水西門得勝門分救四壘經雷正綰等軍分門截勦力戰擊回先後殺斃各門悍賊八九百名

其攻壘將士見城逆均經擊敗一呼齊進時火燄衝天賊卽奪門
逃奔城根撤去釣橋我軍隔水未能輕追當將西門得勝門四壘
概行毀平共斃賊一千四百名該逆外勢雖失柰城垣周圍廣
大四十里我軍萬餘不能合圍況逆賊戒備甚嚴糧食充足立意
死守惟當嚴飭各軍設法攻取迅克堅城以期仰慰 宸廑 上
諭官文等奏進剿廬郡連獲大勝並飭周鳳山策應援穎各軍後
路各摺片廬郡城大而堅我軍不能合圍賊逆戒備甚嚴糧食充
足立意死守非四面合擊約期併舉不足以操勝算目下楚師進
攻西面曾國藩派出之軍攻其南面東面袁甲三一軍已奪回梁
園要隘平毀賊圩計可進逼廬城著卽剋期進攻與楚軍會合夾
擊其通達廬城之巢縣巢湖爲賊匪水陸運糧要道並著官文等
派兵堵截斷其接濟方足制其死命見在賊勢窮蹙正可併力圍

攻一鼓而下規畫東南大局此爲要著毋得頓兵城下日久無功使該逆又生狡謀是爲至要潁州待援甚急總兵成大吉等軍屢經催進何以未見赴援著李續宜飭令星速前進儻敢仍前玩泄卽著嚴參治罪已革副將周鳳山募勇三千人抵鄂經官文等飭令統領所部由孝感一帶直達光固爲成大吉等援潁等軍後路聲援著卽飭令節節埽除進駐三河尖要地爲成大吉等後路策應且通皖軍餉道將此由六百里各諭令知之○諭慶瑞奏龍游等處賊匪分路上竄衢州及閩省邊防同時喫緊分別布置剿防一謂龍游壽昌之賊分爲三路進圍衢州遂昌之賊竄犯江山縣境意圖阻絕餉道經藩司李元度擊退尙屯踞大源口一帶並添調老賊二三萬欲由龍泉鈔出松溪竄犯閩境處州松陽踞匪復紛紛上竄以爲遂賊應援此時浦城一路情形固屬緊要而龍泉

松溪政和三路兵力尙形單薄松政兩縣與建甯等處毗連亦須
方籌防堵該督見擬將龍泉松政各防趕爲布置卽統師馳赴浦
城一帶著卽相度情形何路緊急卽督兵馳赴何路防剿不得株
守一隅以致顧此失彼總兵曾元福所募臺勇見已內渡著迅催
赴營以備援應藩司李元度一軍本係進攻龍游之師經該督檄
令移攻壽昌昨據左宗棠奏稱該督復令李元度一軍回駐衢州
李定太一軍前據該督奏稱飭令派隊分堵龍游壽昌並令林文
察一軍進攻遂昌此次賊卽由龍游等處上竄該總兵何以不能
堵禦其攻剿接仗情形亦未據該督奏報著查明詳細具奏見在
賊勢上趨總由官軍節節撤退所致該督務宜嚴飭各軍奮力進
攻不得退守觀望致成坐困之勢左宗棠一軍見已進駐開化距
衢城不遠並著該督飭令李定太等軍聯絡聲勢力圖進取至甯

波大股賊匪風聞業已他竄僅畱土匪踞守郡城正可乘機進取
該督見派顏青雲督同副將吳鴻源統帶師船由海道進攻著卽
飛飭前進迅圖克復毋誤事機將此由六百里諭令知之○予安
徽陣亡副將陳應傑祭葬世職○壬午諭議政王軍機大臣等韓
超奏提臣督辦軍務甫有轉機請毋庸繳回關防以一事權而收
成效並將該省紳民公呈鈔錄呈覽一摺前據駱秉章奏接據田
興恕函稱聞石逆擾及川境願帶勁旅三千親往助剿當以該提
督勇於改過令其督率所部由綦江取道重慶相機進剿並諭令
韓超將黔省防剿事宜妥爲辦理韓超此奏係在未接寄諭以前
見在川省軍務喫緊亟須添調勁旅力扼賊氛駱秉章前次奏稱
田興恕勁悍善戰甚爲得力自應仍遵前旨星速赴川該提督旣
願歸駱秉章節制則欽差大臣關防卽應齎交該督收存聽候諭

旨黔蜀唇齒相依第川省賊勢方張不能不先其所急田興恕到川後如該省勦辦漸就肅清亦可回軍赴黔協同韓超殲除各匪據稱田興恕恭讀諭旨痛自刻責擬將欽差大臣關防奏請恭繳以息浮言可見其改過遷善尙能勇往該撫卽當成人之美不宜阻止以拂其意韓超以道員擢升巡撫更宜振刷精神力圖報稱田興恕入川以後該撫當遴選材能出眾之將分帶兵勇於上下游未復各城及苗教回夷負嵎處所分投勦擊趕緊掃除不得仍蹈劉源灝故轍於該省軍務一切盡諉卸於提臣也昨有人奏貴州開州知州戴鹿芝德足懷民威能禦賊民情愛戴如慈父母思南府知府徐河清以謀勇著稱因性恥逢迎不爲上司所喜旋卽調省以致思南賊匪未能盡殲韓超在黔有年見聞較確著將該二員平日官聲政績據實覆陳將此由六百里諭令知之○是月

展緩山西徐溝等三縣歉收咸豐十年民欠額賦蠲免福建汀州等二十五府廳縣被擾上年額賦